

四庫全書

史部

欽定四庫全書

文獻通考卷三百三十四

鄱陽馬端臨貴與著

四裔考十一

葱茈羌

燉煌西西域之南山中從姑羌

姑而遮反

西至葱嶺數千里

有月氏餘種葱茈羌白馬黃牛羌各有酋豪北與諸國接不知其道里廣狹傳聞黃牛羌種類孕身六月生南

與白馬羗鄰並魏時聞焉

吐谷渾

吐谷渾本遼東鮮卑也西晉時酋帥徒何涉歸有二子

長曰吐谷渾少曰若洛廐

胡罪反

代統部落別為慕容氏

渾庶長廐正嫡父在時分七百戶與渾渾與廐二部俱
牧馬馬鬪相傷廐怒遣使謂渾曰先公蒙分與兄弟異
部牧馬何不相遠而令馬鬪渾曰馬是畜生食草飲水
春氣發動所以致鬪鬪在於馬而怒於人邪乖別甚易

今當去汝於萬里之外矣於是擁馬西行乃西附陰山

今朔方之北

屬永嘉之亂始度隴西止於枹罕而後子孫據

有甘松之南洮水之西南極於白蘭在益州西北

甘松山在

今合川郡境今臨洮和政郡之南及合川郡之地

其地四時常有冰雪唯六七

月雨雪甚盛若晴則風飄沙礫有麥無穀其青海周廻

千餘里海中有小山每冬冰合後以良牝馬置此山至

來冬收之馬有孕所生得駒號曰龍種吐谷渾嘗得波

斯草馬放入海因生驄駒能行千里故時稱青海驄焉

至其孫葉延以禮云公孫之子得以王父字為氏吾祖
始自昌黎先宅於此今以吐谷渾為氏尊祖之義也自
吐谷渾至葉延曾孫視羆皆有才略知古今司馬博士
皆用儒生至其子阿豺自號車騎將軍沙州刺史部內
有黃沙周迴數百里不生草木因號沙州阿豺兼并氐
羌地方數千里號強國升西強山觀墊江源問於郡寮
曰此水流更有何名由何郡國入何水也其長吏曾和
曰此水經仇池過晉壽出宕渠始號墊江至巴郡入江

度廣陵會於海阿豺曰水尚知歸吾雖塞表小國而獨
無所歸乎乃遣使南通宋獻方物宋少帝封為澆河公
文帝元嘉中又加朝命遣使入朝貢阿豺有子二十人
病謂其母弟慕利延取箭一隻折之慕延折之復命取
十九箭折之慕延不能折阿豺曰汝曹知不單者易折
衆則難摧戮力一心社稷可固既卒弟慕瑱立遣軍擊
乞伏弋蔓敗之弋音戎東奔隴右慕瑱據有其地其時赫
連定據長安為後魏主所攻敗擁秦雍戶口十餘萬西

次罕開幕瓚拒擊大破之生擒定送於魏後弟慕延立
魏太武帝遣軍擊延大破之慕延率部落西奔白蘭攻
破于闐國南依罽賓七年乃還舊土慕延死阿豺兄樹
洛干子拾寅立始邑於伏羅川至元孫夸呂立自號為
可汗理伏俟城在青海西十五里有地方數千里其西
北諸雜種謂之阿貲虜貳即移反其南界隴涸城去城都千
餘里大城有四一在清水川一在赤水一在澆河一在
吐屈真川皆子弟所理其主理慕賀川西有黃沙南北

百二十里東西七十里不生草木雖有城郭不居而隨

逐水草官有王公僕射尚書及郎中之號其主椎

直追反

髻以皂為帽其妻衣織成裙披錦袍辮髻於後首戴金花丈夫衣服略同於華夏多以罽羅為冠亦以繒為帽婦人皆貫珠束髮以多為貴兵器有弓刀甲稍國無常賦須則稅富室商人以充用焉父兄亡妻後母及嫂等與諸夷俗同死者亦皆埋殯其服制葬訖則除之性貪婪忍於殺害後周明帝武成初夸呂寇涼州詔賀蘭祥

率兵討破之又攻拔其洮陽泥和二城置洮州

今臨洮郡地

而還武帝天和初其龍涸王莫昌率衆降以其地為扶

州

今同昌郡地

二年復遣皇太子征之軍度青海至伏俟城

夸呂遁走虜其餘衆而還隋開皇中夸呂侵弘州

在今安化

郡馬嶺縣界

遣上柱國元諧擊之賊悉發國中兵自曼頭至

於樹敦甲騎不絕諧頻擊破之夸呂率其親兵遠遁其

名王十三人各率部落而降夸呂在位且百年死以後

還以慕容為姓其子伏允立煬帝初伏允遣子順來朝

帝令鐵勒襲大敗之伏允東走保西平

今西平郡

帝復令觀

王雄以掩之大破其衆伏允遁逃部落來降十萬餘口

伏允懼南遁於山谷間其故地皆空自西平臨羌城以

西且末以東祁連以南雪山以北東西四千里南北二

千里皆為隋有置郡縣鎮戍發天下輕罪徙居之

其地在今

西平郡之西張掖酒泉郡之北隋氏置西海且末河源等郡

於是留順不之遣伏允

無以自資率其徒數千騎客於党項大業末天下亂伏

允及順復其故地唐武德初順以兵助擊李軌自號為

大寧王太宗時遣使入朝未還即寇鄯州又掠岷州寇涼州乃命段志元等討之得牛羊二萬還九年復命李靖侯君集等擊之伏允遠遁為左右所殺子順降於是重建其國封順為西平郡王仍加赧巨屈反胡呂烏可汗之號旋又為其下所殺十年立順子諾曷鉢為河源郡王主其國自是衰弱而吐蕃強盛與相攻俱來請師詔不許遣大將軍蘇定方為安集大使平兩國怨後吐蕃遂有其地咸亨元年以薛仁貴郭待封等總兵五萬討

吐蕃且納諾曷鉢於故廷王師敗於大非川舉吐谷渾地皆陷諾曷鉢與親近數千帳纔免三年乃徙浩亶水南諾曷鉢以吐蕃盛勢不抗而鄯州地狹又徙靈州帝為置安樂州即拜刺史欲其安且樂云諾曷鉢死子忠立忠死子宣超立聖歷三年拜左豹韜員外大將軍襲故可汗號餘部詣涼甘肅瓜沙等州降宰相張錫與右武衛大將軍唐休璟議徙其人於秦隴豐靈間令不得畔去涼州都督郭元振以為吐谷渾近秦隴則與監牧

雜處置豐靈又邇默啜假在諸華亦不遽移其性也前
日王孝傑自河源軍徙耽爾乙句貴置靈州既而叛乃
入牧坊掠羣馬癡夷州縣是則遷中土無益之成驗往
素和貴叛去於我無損但失吐谷渾數十部豈與句貴
比邪今降虜非彊服皆突矢刀棄吐蕃而來宜當循其
情為之制也嘗甘肅瓜沙降者即其所置之因所投而
居情易安磔數州而勢自分順其情分其勢不擾於人
可謂善奪戎心者也歲遣鎮遏使者與宣超兄弟撫護

之無令相侵奪生業固矣有如叛去無損中國詔可宣
超死子曦皓立曦皓死子兆立吐蕃復取安樂州而殘
部徙朔方河東語謬為退渾貞元十四年以朔方節度
副使左金吾衛大將軍慕容復為長樂都督青海國王
襲可汗號復死停襲吐谷渾自晉永嘉時有國至龍朔
三年吐蕃取其地凡三百五十年及此封嗣絕矣

乙弗敵

乙弗敵後魏聞烏在吐谷渾北國有屈海其海周迴千

餘里衆有萬落風俗與吐谷渾同然不食五穀唯食魚
與蘇子蘇子狀如中國苟杞子或赤或黑西有契翰一
部風俗亦同土特多狼白蘭山西北又有可蘭國風俗
亦同目不識五色耳不聞五聲是西北諸邊外中醜類
也土無所出直大養羣畜而戶落亦可萬餘人頑弱不
知鬪戰忽見異人舉國便走性如野獸體輕工走逐不
可得

宕昌

宕昌羌後魏時興焉亦三苗之允與先零燒當罕开諸
部姓別自立酋帥皆有地分不相統攝宕昌即其一也
俗皆土著居有棟宇其屋織毼牛尾及殺羊毛覆之無
法令又無徭賦唯征伐之時乃相屯聚不然則各事生
業不相來往皆衣裘褐牧養羴牛羊豕以供其食俗有
蒸報無文字但取木榮落以記歲時三年一相聚殺牛
羊以祭天俗重虎皮以之送死有梁勤者代為酋帥得
羌豪心乃自稱王其界自仇池以西東西千里席水以

南南北北八百里

仇池山在同谷郡上祿
席水在今天水上邽縣

地多山阜部衆

二萬餘落至其孫彌念始遣使於後魏大武帝拜為宕

昌王七葉孫彌秦皆受南北兩朝封爵

宋齊梁及魏
並各羈縻之

後

見兩魏分隔永熙末種人企定乃引吐谷渾寇金城

今

地後企定弟彌定寇石門戍周武帝大和初詔大將軍

田弘討平之以其地為宕州

今懷
道郡

鄧至

鄧至羌之別種也後魏時興焉有像舒理者代為白水

酋帥因地名為獮鄧至王其地自干亭以東平武以西

汶嶺以北宕昌以南

今懷道郡之南通化郡之北交川臨翼同昌郡之地也

風土

習俗與宕昌同自舒理至十代孫舒彭附於後魏孝文帝封甘松縣子鄧至王宋文帝及武帝時俱遣使南來修貢受其官爵後數代西魏恭帝初其主檐術因亂來奔周文帝遣兵送還自後無聞鄧至之西有赫羊國初其部內有一羊形甚大至鮮赤故為國名又有東亭衛大赤水寒巖石河薄陵下習蒼驤覃等諸羌國風俗

獷與鄧至國不同魏時遣使貢獻皆假以雜獯將軍子男巨帥之名

党項

党項羌三苗之後在古析支之地漢西羌之別種有宕昌白狼皆自稱獼猴種魏晉以降西羌微弱周滅宕昌鄧至之後党項始強有佃封氏費聽氏往利氏頗超氏野律氏房當氏米禽氏拓跋氏而拓跋最為強族其人多壽年至百五六十歲其地東接臨洮西平西拒葉護

南北數千里處山谷間每姓別為部落大者五千餘騎
小者千餘騎織毼牛尾及黏羶毛為屋服裘褐披氊為
上飾俗尚武力無法令各為生業有戰陣則屯聚無徭
役不相往來養羴牛羊豬以供食不知稼穡其俗淫穢
蒸報於諸國中為甚無文字但候草木以記歲時三年
一聚會殺牛羊以祭天人年八十以上死者以為令終
親戚不哭少者死則為天枉共悲哭之有琵琶橫吹擊
缶為節魏周之際數來擾邊隋文帝為丞相時中原多

故因此大為寇掠蔣公梁睿既平王謙請因還師討之
開皇元年有千餘家歸化五年拓跋寧叢等各率衆詣
旭州內附授大將軍其部下各有等差十六年復寇會
州詔發隴西兵討之大破其衆人相率降遣子弟入謝
罪帝謂曰還語爾父兄人生須有定居養老幼乃乍還
乍走不羞鄉里邪自是朝貢不絕唐貞觀三年其酋細
封步賴舉部降以其地為軌州即授步賴刺史其後諸
酋悉內屬以其地為岨奉巖遠四州即首領拜刺史其

後拓跋赤辭等又舉部降以其地為懿嵯麟可三十二州以松州為督府擢赤辭西戎州都督賜姓李貢職不絕於是自河首積石山而東皆為中國地後吐蕃寢盛拓跋畏偪請內徙始詔慶州置靜邊等處之地乃入吐蕃其處者皆為吐蕃役屬更弭藥至德末為吐蕃所誘使為鄉道寇邊俄悔悟來朝乾元間中國數亂因寇邠寧二州肅宗詔郭子儀杜冕桑如珪分二隊討之子儀至党項潰去上元元年在涇隴部落十萬衆詣鳳翔節

度使崔光遠降二年與渾奴刺連和寇寶雞殺吏民掠財珍焚大散關入鳳州殺刺史蕭愔節度使李鼎追擊走之明年又攻梁州刺史李勉走進寇奉天大掠華原同官去詔臧希讓代勉為刺史於是歸順乾封歸義順化和寧和義保善寧定羅雲朝鳳凡十州部落詣希讓獻款丐節印詔可僕固懷恩之叛誘党項渾奴刺入寇衆數萬掠鳳翔盤屋大酋鄭廷郝德入同州刺史韋勝走節度使周智光破之澄城閏月又入同州焚官私室

廬壁馬蘭山郭子儀遣兵襲之退保三堡子儀遣慕容
休明諭降廷德子儀以党項吐谷渾部落散處鹽慶等
州其地與吐蕃濱近易相脅即表徙靜邊州都督夏州
樂容等六府党項於銀州之北夏州之東寧朔州吐谷
渾住夏西以離沮之召靜邊州大首領左羽林大將軍
拓跋朝光等五刺史入朝厚賜賚使還綏其部先是慶
州有破丑氏族三野利氏族五把利氏族一與吐蕃姻
援贊普悉王之因是擾邊凡十年子儀表工部尚書路

嗣恭為朔方留後將作少監梁進用為押党項部落使
置行慶州且言党項陰結吐蕃為變可遣使者招慰艾
其反謀因令進用為慶州刺史嚴邏以絕吐蕃往來道
代宗然之又表置靜邊芳池相興三州都督長史永平
旭定清寧寧保忠順靜塞萬吉等七州都督府於是破
丑野利把利三部及思樂州刺史拓拔乞悔等皆入朝
宜定州刺史折磨部落芳池州野利部並徙綏延州太
歷末野利禿羅都與吐蕃叛招餘族不應子儀擊之斬

禿羅都而野利景庭野利剛以其部數千人入附雞子
川六州部落曰野利越詩野利龍兒野利厥律兒黃野
海野宰等居慶州者獮東山部夏州者獮平夏部永泰
後稍徙石州後為永安將阿史那思暕賦索無極遂亡
走河西元和時復置宥州護党項至太和中寢強數寇
掠然器械鈍苦畏唐兵精則以善馬購鎧善羊貨弓矢
廊坊道軍糧使李石表禁商人不得以旗幟甲冑五兵
入部落告者舉罪人財畀之至開成末種落愈繁富賈

人齎繒寶鬻羊馬藩鎮乘其利強市之或不得直部人怨相率為亂至靈鹽道不通武宗遣使招之功不就宣宗大中四年內掠邠寧詔鳳翔李業河東李拭合節度兵討之羗乃破殄餘種竄南山後唐同光二年其首領薄香來貢良馬天成二年河西党項如連山等來朝共進馬四十匹宰相奏党項之衆競赴都下賣馬常賜食禁廷醉則連袂歌其土風凡將到馬無駑良並云上進國家雖約價直以給之而計其館給賜賚不啻倍價耗

蠹國用請止之上以為國家常苦馬不足今番官自來
中國錫賜乃朝廷常事不足言費自是番部羊馬不絕
於路長興元年二年俱入貢授其首領以官三年以西
路党項部族刼掠使臣及外域進奉詔邠州節度使樂
彥稠等率步騎七千討之誅其二十族七百餘人獲其
大首領六人黨類二千人駝馬牛羊數千計周廣順二
年以府州党項泥也等之族大首領為大將軍宋時靈
夏綏麟府環慶豐州振戎天德振武軍並其族帳建隆

二年代州刺史折也埋來朝也埋党項之大姓也世居河右有捍邊之功故授以方州召令入覲而遣還開寶元年直蕩族首領啜佖等引并人入寇府州為王師所敗招降之太平興國六年七年府州豐州党項族首領俱來貢雍熙初諸族渠帥附李繼遷為寇詔判四方館事田仁節及閤門使王侁等相繼領兵討擊并賜麟府夏銀豐州及日利月利族敕書招諭之二年四月侁等於銀州北破悉利諸族斬首三千六百餘級生擒八十

人俘蕃漢老小一千四百餘口器甲一百八十六梟偽
署代州刺史折羅遇并弟埋乞獲馬牛羊三萬計五月
又於開光谷西杏子平破保寺保杏族追奔二十餘里
斬首八百餘級梟其首領七埋已等五十七人生擒四
十九人係其老小三百餘人獲牛羊馬驢凡四千餘計
又破保洗兩族俘三千人降五十五族獲牛羊八千計
旣等麟州及三族寨羌人二千餘族皆降番官折軍七
等六十四人獻馬首罪願改圖自効為國討賊遂與部

下兵濁輪川斬賊首五十級酋豪二十人李繼遷及三族寨監押折御也皆遁去命內客省使郭守文自三交乘驛亟往與王侁等同領邊事其後侁等又破銀州浪悉訛等族及夏州岌伽羅膩等族又招降銀麟夏等州三族寨諸番一百二十五族合萬六千一百八十九戶乃賜勅書以安撫之端拱二年夏州趙保忠言準詔市馬已獲三百匹其宥州御泥布等族黨附繼遷不肯賣馬臣已領兵掩殺二百餘人擒百餘人其族即降詔書撫

諭之四年鄭文寶獻議禁青鹽蕃族四十四首領引騎
萬三千人入寇環州石昌鎮知環州程德言等擊走之
因詔弛鹽禁由是部族寧息自是朝貢不絕官其首領
賜錦袍銀帶茶綵以撫慰之景德元年麟府路言附契
丹戎人言泥族拔黃太尉率三百餘帳內屬拔黃本大
族居黃河北古豐州前數犯邊阻市馬之路其首領勇
黠難制契丹結之署為太尉今悉衆款塞詔府州厚賜
茶綵給公田依險居之計口賦粟毋得侵擾三年府州

折堆昌言兀泥族大首領名崖從父盛佑族為趙德明
白池軍主密遣使來諭名崖云德明雖外托修貢之名
而點閱兵馬尤急恐必劫掠山界名崖以告上嘉之降
詔撫諭就賜錦袍銀帶十一月鎮戎軍曹瑋言叛去蕃
官蘇尚娘復來歸附詔報瑋曰尚娘反覆無信特恐狙
詐以誤邊吏又使德明緣此為詞不可納也自後訖天
禧之末蕃族來歸朝貢者不絕每加拊慰或補官賜罷
幣羈縻之恩有加焉

白蘭

白蘭羌之別種東北接吐谷渾西至叱利摸徒南界郡
鄂風俗物產與宕昌同周武帝保定元年朝獻使至有
勝兵萬人勇於戰鬪唐武德二年使者入朝以其地為
維恭二州貞觀六年與契苾數十萬內屬永徽時特浪
生羌卜樓大首領凍就率衆來屬以其地為劍州龍朔
後白蘭春桑及白狗羌為吐蕃所臣藉其兵為前驅白
狗與東會州接勝兵纔千人在西北者天授中內附戶

凡二十萬以其地為朝吳浮十州散居靈夏間

吐蕃

吐蕃在吐谷渾西南不知有國之所由或云禿髮利鹿

孤有子樊尼其主僭檀為乞伏熾盤所滅樊尼率餘種

依沮渠蒙遜其後子孫西魏時為臨松郡丞

今張掖郡張掖縣界

與主簿皆得衆心因魏末中華擾亂招撫羣羌日以強

大遂改姓為罕

蘇骨反

敦野至今故其人號其主曰贊府

貴臣曰主簿又或云始祖贊普自言天神所生號鵲堤

悉補野因為姓

宰敦野與悉補野言訛其實一也或云本姓弃蘇農也

其國出

都城五百里過烏海入吐谷渾部落彌多彌蘇毗及白
蘭等國至吐蕃界其國風雨雷雹每隔日有之盛夏節
氣如中國暮春之月山有積雪地冷瘴令人氣急不甚
為害其俗重漢繒而貴瑟瑟男女用為首飾其君長或
在歧布川或居邏婆川有小城而不久坐大氊帳張大
拂廬其下可容數百人兵衛極嚴而衙府甚狹俗養牛
羊取乳酪供食兼取毛為褐而衣焉不食驢馬肉以麥

為麯人死殺牛馬以殉取牛馬積累於墓上其墓正方累石為之狀若平頭屋其臣與君自為友號曰共命人其數不過五人君死之日共命人皆日夜縱酒葬日於脚下針血盡乃死便以殉葬又有親信人用刀當腦縫鋸亦有將四尺木大如指刺兩肋下死者十有四五亦殉葬焉設官父死子代絕嗣即近親襲焉非其種類輒不相服其官章飾有五等一謂瑟瑟二謂金三謂金飾銀上四謂銀五謂熟銅各以方圓三十褐上裝之安膊

前以辨貴賤法令嚴肅兵器有弓刀楯稍甲冑每戰前
隊皆死後隊方進人馬俱披鎧子甲其制甚精周體皆
遍唯開兩眼非勁弓利刀之所能傷也其戰必下馬列
行而陣死則遞收之終不肯退槍細而長於中國者弓
矢弱而甲堅人皆用劍不戰亦負劍而行其驛以鐵箭
為契其箭長七寸若急驛膊前加著一銀鵲有草名速
古芒葉長二寸狀若斜蒿有鼠尾長於常鼠其國禁殺
者加其罪有可跋海去赤嶺百里方圓七十里東南流

入蠻與蠻西珥河合流而東號為漾鼻水又東南出會
川為瀘水烏自赤嶺至邏婆川絕無大樹木唯有楊柳
人以為資置大論以統理國事無文字刻木結繩為約
徵兵用金箭寇至舉燧與其臣下一年一小盟

用羊狗
獼猴

三年一大盟

用人馬
牛驢

以麥熟為歲首其國都號為邏婆

城用法嚴整議事則自下而起因人所利而行之此其
所以能強且久也重壯賤老母拜於子重兵死惡病終
以累代戰歿者為甲門臨陣奔北者懸狐尾於其首表

其似狐之怯其贊普美贊雄霸西域隋開皇中其主論贊索美贊都牂牁西足播城已五十年矣國界西南與婆羅門接自唐初有勝兵數十萬號為強國男女皆辮髮壇裘以赭塗面無器物以手捧酒而飲之屈木令圓以皮作底就中而食俗多金及小馬党項白蘭諸部及吐谷渾西域諸國咸畏懼之至其主弃蘇農贊貞觀十五年正月以宗室女封文成公主降於吐蕃贊普命禮部尚書江夏王道宗送之贊普親迎於河源見王執子

壻禮甚謹歎大國服飾禮儀之美俯仰有愧沮之色謂所親曰我祖父未有通婚大國者今我得尚大唐公主當築一城以誇後代仍遣酋豪子弟請入國學以習詩書至高宗初封賓王蘇農死其子早卒以孫代立號乞梨拔布幼小大相祿東贊攝知國事總章中以兵臨吐谷渾吐谷渾告急咸亨中高宗令將軍薛仁貴郭待封等率衆十餘萬伐之至大非川為大論欽陵所敗因遂滅吐谷渾欽陵姓薛氏其父祿東贊頗曉兵術吐蕃贊

府以國事委之講兵訓師雅有節制吐蕃之并兼諸羌
雄霸西土東贊有力焉有子五人及東贊死欽陵兄弟
復專其國上元中寇鄯廓等州儀鳳二年遣工部尚書
劉審禮為洮河軍總管率兵十八萬以討之戰於青海
軍敗沒於陣調露二年中書令李敬元戰於大非川又
敗績續遣黑齒常之襲擊破之武太后如意初武威軍
總管王孝傑大破吐蕃復龜茲于闐疎勒碎葉四鎮至
萬歲通天初又寇涼州執都督許欽明欽陵兄弟有才

略欽陵多居中諸弟分鎮方面諸蕃憚之二年吐蕃大
論欽陵遣使請和武太后遣前梓州通泉縣尉郭元振
往至野狐河與陵遇元振曰東贊事朝廷誓好無窮今
猥自絕歲擾邊父通之子絕之孝乎父事之子叛之忠
乎陵謝曰天子許和罷兩國戍守以便百姓豈不休哉
然以西十姓突厥四鎮諸國或時附蕃或時附漢斯類
皆多翻覆乞聖恩拔去鎮守分離屬國多建君長使自
為守既不款漢又不屬蕃人免憂慮荒陬幸甚元振曰

唐以十姓四鎮撫西土為列國主道非有他且諸部與吐蕃異久為唐編人矣欽陵曰使者意我規削諸部為唐邊患邪我若貪土地財賦彼青海湟川近矣今捨不爭何哉突厥諸部磧漠廣莽去中國遠甚安有爭地萬里外耶且四夷唐皆臣并之雖海外地際靡不磨滅吐蕃適獨在者徒以兄弟小心得相保耳十姓五咄陸近安西於吐蕃遠俟斤距我裁一磧騎士騰突不易旬至是以為憂也烏海黃河關源阻奧多癘毒唐必不能入

則弱甲屏將易以為蕃患故我欲得之非闕諸部也甘
涼距積石道二千里其廣不數百狹才百里我若出張
掖玉門使大國春不耕秋不穫不五六年可斷其右今
棄不為亦無虞於我矣青海之役黃仁素約和邊守不
戒崔知辯徑俟斤掠我牛羊萬計是以求之使使者固
請元振固言不可許后從之欽陵專國久常居中制事
諸弟皆領方面兵而贊婆專東境幾三十年為邊患兄
弟皆才略沈雄衆憚之贊普子罷弩悉弄既長欲自得

國漸不平乃與大臣論巖等圖去之欽陵方提兵居外
贊普託言獵即勒兵執其親黨二千餘人殺之發使者
召欽陵贊婆欽陵不受命贊普自討未戰欽陵兵潰乃
自殺左右殉而死者百餘人贊婆以所部及兄子莽布
支等款塞遣羽林飛騎迎勞擢贊婆特進輔國大將軍
歸德郡王莽布支左羽林大將軍安國公皆賜鐵券禮
慰良厚贊婆即領部兵戍河源死贈安西大都護又遣
左肅政臺御史大夫魏元忠為隴右諸軍大總管率隴

右諸軍大使唐休璟出討方虜攻涼州休璟擊之斬首二千級於是論彌薩來朝請和贊普自將萬騎攻悉州都督陳大慈四戰皆克明年乃獻馬黃金求婚而虜南屬帳皆叛贊普自討死於軍諸子爭立國人立棄隸蹠贊為贊普始七歲使者來告喪且求盟又使大臣悉董熱固求婚未就會監察御史李知古建討姚州蠻削吐蕃向導詔發劍南募士擊之蠻酋以情輸虜殺知古尸以祭天進攻蜀漢詔靈武監軍右臺御史唐九徵為姚

雋道討擊使率兵擊之虜以鐵絙梁漾濞二水通西洱
蠻築城戍之九徵毀絙夷城建鐵柱於滇池以勒功中
宗景龍二年還其婚明年遣使入貢可敦又遣宗俄請
婚帝以雍王守禮女為金城公主妻之賜主錦繒雜伎
甚厚公主至吐蕃自築城以居拜楊矩為鄯州都督吐
蕃雖外和而陰銜怒即厚餉矩請河西九曲為公主湯
沐矩表與其地九曲者水甘草良宜畜牧近與唐接自
是虜益張雄易入寇元宗開元二年其相坌達延上書

宰相乞載盟文定境於河源帝令姚崇等報書命解琬持神龍誓書吐蕃亦遣其臣來未幾而以兵十萬寇臨洮入攻蘭渭掠監馬楊矩懼自殺詔薛訥王晙等討之斬首萬七千獲羊馬無慮二十萬又戰長子虜大敗相枕籍死洮水為之不流宰相建言吐蕃本以河為境以公主故乃橋河築城置獨山九曲二軍距積石二百里今既負約請毀橋復守河如約詔可遣左驍衛郎將尉遲環使吐蕃慰安公主然小小入犯邊無閑歲於是郭

知運王君奭相繼節度隴右河西以扞之吐蕃遣宗俄
因子到洮水祭戰死士且請和然恃盛彊求與天子敵
國語悖傲使者至臨洮詔不內金城公主書求聽修好
且言贊普君臣欲與天子共署誓刻吐蕃又遣使者上
書言孝和皇帝嘗賜盟時唐宰相豆盧欽望魏元忠李
嶠紀處訥等凡二十二人及吐蕃君臣同誓孝和皇帝
崩太上皇嗣位修睦如舊然唐宰相在誓刻者皆歿今
宰相不及前約故須再盟比使論乞力等前後七輩往

未蒙開許且張元表李知古將兵侵暴甥國故違誓而戰今舅許湔貸前惡歸於大和甥既堅定然不重盟為未信要待新誓也帝謂昔已和親有成言尋前盟可矣不許復誓禮其使而遣之且厚賜贊普自是歲朝貢不犯邊十年攻小敦律國其王沒謹忙貽書北廷節度使張孝嵩曰敦律唐西門失之則四方諸國皆墮吐蕃孝嵩乃遣步騎四千與沒謹忙兵夾擊吐蕃敗之復九城故地敦律王來朝置綏遠軍以扞吐蕃欲假道敦律以

攻四鎮十四年悉諾邏兵入大斗谷遂攻甘州隴右節度使王君奭遣兵追躡之多所俘獲時中書令張說以吐蕃出入勝負略相當甘涼河鄯之人調發困甚願聽其和帝不從未幾悉諾邏等陷瓜州遂攻玉門軍安西副都護趙頤貞擊却之乃命蕭嵩張守珪城瓜州屢破吐蕃置振武軍獻俘於朝詔軍士掩戰能擒其王者授大將軍士益奮吐蕃乃求和忠王友皇甫惟明等請許之帝乃以書賜金城公主贊普大喜遣人隨使者入朝

表言甥以文成金城公主敢失禮乎曩特以冲幼枉為
邊將讒亂如蒙澄亮死且萬足千萬歲不敢先負盟且
獻怪寶上禮其使遣御史大夫崔琳報聘吐蕃又請交
馬於赤嶺互市於甘松嶺宰相裴光庭曰甘松中國阻
不如許赤嶺乃聽以赤嶺為界表以大碑刻約其上又
請五經勅祕書寫賜并賜物萬計吐蕃遣人謝明年又
上寶器數百具制治詭殊其後吐蕃西擊勃律勃律告
急帝諭令罷兵不聽卒殘其國於是崔希逸為河西節

度使鎮涼州故時疆畔皆樹壁守捉希逸謂虜戍將乞力徐曰兩國約好而守備不廢云何請皆罷以便人乞力徐曰公忠誠無不可恐朝廷未皆信脫掩吾不備其可悔希逸固邀乃許共刑白犬盟而後悉撤障壁虜畜牧被野明年僣史孫誨奏事妄言虜無備可取也帝采之詔內豎趙惠琮共往按狀小人欲徼幸至涼州因共矯詔詔希逸發兵襲破吐蕃青海上斬獲不貲乞力徐遁去吐蕃恚不朝二十六年大入河西希逸拒破之希

逸既而深自愧以失信悵悵至死誨亦坐事誅乃命蕭
炆杜希望王昱等分道經略碎赤嶺碑希望破吐蕃軍
三萬昱以劍南兵入攻安戎城次蓬婆嶺吐蕃盡銳來
攻昱大敗士死凡數萬吐蕃攻維州不得志遣使請和
不許虜乃悉衆四十萬攻承風堡臧希銳破之又襲廓
州攻振武軍皇甫惟明哥舒翰等破之俘其大酋是時
吐蕃與蠻閭羅鳳聯兵攻瀘南劍南節度使楊國忠方
以姦罔上自言破蠻衆六萬於雲南拔故洪州等三城

獻俘口哥舒翰破洪濟大莫門諸城收九曲故地列郡
縣實天寶十二載於是置神策軍於臨洮西澆河郡於
積石西及宛秀軍以實河曲後二年蘇毗子悉諾邏來
降封使義王賜姓李氏蘇毗強部也是歲贊普乞黎蘇
籠臘替死子孛悉籠臘贊嗣遣使者修好詔京兆少尹
崔光遠持節賫冊帛祠還而安祿山亂哥舒翰悉河隴
兵東守潼關而諸將各以所鎮兵討難始號行營邊候
空虛故吐蕃得乘隙暴掠至德初取雋州及威武等諸

城入屯石堡其明年使使來請討賊且修好肅宗遣給事中南巨川報聘然歲內侵取廓霸岷等州及河源莫門軍使數來請和帝雖審其譎姑務紓患乃詔宰相郭子儀蕭華裴遵慶等與盟寶應元年陷臨洮取秦成渭等州明年使散騎常侍李之芳太子左庶子崔倫往聘吐蕃留不遣破西山合水城明年入大震關取蘭河鄯洮等州於是隴右地盡亡進圍涇州入之降刺史高暉又破邠州入奉天副元帥郭子儀禦之吐蕃以吐谷渾

党項兵二十萬東略武功渭北行營將呂日將戰盤屋
西破之又戰終南日將走代宗幸陝子儀退趨商州高
暉導虜入長安立廣武王承宏為帝改元擅作赦令署
官吏衣冠皆南奔荆襄或逋棲山谷亂兵因相攘鈔道
路梗閉光祿卿殷仲卿率千人壁藍田選二百騎渡澧
或紿虜曰郭令公軍且來吐蕃大震會少將王甫與惡
少年伐鼓譟苑中虜驚夜引去子儀入長安高暉東奔
至潼關守將李日越殺之吐蕃留京師十五日乃走天

子還京吐蕃退圍鳳翔節度使孫志直拒守鎮西節度使馬璘以千騎戰却之吐蕃屯原會成渭間自如也是歲南入松維保等州及雲山新籠城明年還使人李之芳等劍南嚴武破吐蕃南鄙兵七萬拔當狗城會僕固懷恩反自靈武遣其將范志誠任敷合吐蕃吐谷渾兵攻邠州白孝德郭晞嬰壘守乃入居奉天西子儀入奉天按軍不戰郭晞以銳士夜擣其營斬首數千級奪馬五百取四將吐蕃引去是時嚴武拔鹽州又戰西山取

其衆八萬虜圍涼州河西節度使楊志烈不能守跳保
甘州而涼州亡永泰元年吐蕃請和詔宰相元載杜鴻
漸與虜使者同盟懷恩不得志導虜與回紇党項羌渾
奴刺犯邊吐蕃大酋尚結息贊摩尚悉東贊等衆二十
萬至醴泉奉天邠將白孝德不能抗任數以兵略鳳翔
盤屋於是京師戒嚴天子自率六軍屯於苑吐蕃逼奉
天使朔方兵馬渾日進率勇士馳之左右擊刺皆應弦
仆虜大驚乃夜攻其營斬千餘級又戰馬嵬凡七日破

賊萬人斬獲甚衆會懷恩死虜謀無主遂與回紇爭長
回紇怒詣子儀請擊吐蕃自效子儀許之使白元光合
兵攻吐蕃於靈臺西大破之帝乃班師永泰大歷間再
遣使者來聘詔戶部尚書薛景仙往報又詔宰相與吐
蕃使者盟俄寇靈州靈州屯兵破之復略邠州馬璘白
元光等再破其衆天子以虜數入塞詔治守障徙當悉
柘靜恭五州皆據險以守八年侵靈州進寇涇邠渾瑊
與戰不利馬璘以兵掩之郭子儀又破其衆十萬九年

帝遣諫議大夫吳損修好虜亦使使者入朝明年復攻
臨涇隴州又明年崔寧破其兵斬首萬級俘獲甚衆吐
蕃不得志入掠黎雅於是劍南兵合南詔與戰破之擒
其大酋十三年虜以四萬騎寇靈州又合南詔衆二十
萬攻茂州略扶文遂侵黎雅詔發幽州兵與戰大破之
初虜使數至留不遣所俘虜口悉部送江南德宗即位
以歲與虜戰亡獲相償謀綏懷之遣太常少卿韋倫持
節歸其俘五百厚給衣褚切勅邊吏護亭障無輒侵虜

地吐蕃始聞未信使者入境乃感畏時乞立贊為贊普
即發使者隨倫入朝又遣使獻方物明年殿中少監崔
漢衡往使贊普曰我與唐舅甥國詔書乃用臣禮卑我
又請雲州西盡賀蘭山為吐蕃境且引景龍詔書曰唐
使至甥先與盟蕃使至舅亦將親盟贊普曰其禮本均
帝許之以獻為進賜為寄領取為領之並約地於賀蘭
其大相尚悉結嗜殺人以劍南之敗未報不助和議次
相尚結贊有謀固請休兵贊普卒用結贊為大相乃講

好約盟境上約唐地涇州右盡彈箏峽隴州右極清水
鳳州西盡同谷劍南盡西山大度水吐蕃守鎮蘭渭原會
西臨洮東成州抵劍南西磨些諸蠻大度水之西南盡
大河北自新泉軍抵大磧南極賀蘭橐駝嶺其間為閑
田二國所棄戍地毋增兵毋創城堡毋耕邊田帝又命
宰相尚書與虜使盟長安朱泚之亂吐蕃請助討賊詔
遣使持節慰撫渾瑊用論莽羅兵破泚將韓旻於武亭
川初與虜約得長安以涇靈四州畀之會大疫虜輒引

去及泚平責舊約求地天子薄其勞第賜詔書償結贊
莽羅等帛萬疋於是虜以為怨貞元二年虜犯涇隴邠
寧掠人畜敗田稼尚結贊屯上砦原遣使請盟李晟遣
部將王佖以銳兵三千入汧陽薄其中軍虜驚潰走結
贊僅自脫虜衆三萬侵鳳翔晟又擊却之又攻鹽夏陷
之天子以邊人殘没下詔避殿自責詔駱元光經略鹽
夏虜得二州皆戍以兵乃自屯鳴沙然饋餉數困於是
駱元光韓游瓌濱塞而屯馬燧次石州跨河相犄角結

贊懼屢請盟天子不許乃厚賂乞和於燧燧以為情身
入見天子結贊又使言若許盟當以鹽夏還唐乃以渾
瑊為盟會使約盟平涼結贊伏精騎三萬於西縱瑊等
就幄虜三伐鼓衆譟而興瑊遁得免副使崔漢衡等皆
被執始結贊欲擒瑊等擣虛入寇及見漢衡等坐帳中
慢言渾瑊戰武功我力也許裂地償我而自食其言吾
既作金枷必得瑊以見贊普今失之徒致公等無益也
虜戍鹽夏涉春疫大興皆思歸乃火其廬舍頽郭堞而

去結贊歸漢衡等而却其使結贊乃以兵犯鳳翔入寶雞焚掠而去又剽汧陽華亭掠牛羊率萬計涇隴邠之民蕩然盡矣諸將曾不能得一俘但賀賊出塞而已四年五月虜三萬騎略涇邠寧慶鄜五州之鄙焚吏舍民間係執數萬又寇寧州轉剽鄜坊五年韋臯以劍南兵與戰殺其將西南少安不三年盡得舊州地久之北廷沙陀別部叛吐蕃因是陷北庭都護府安西道絕獨西州人尚為唐守八年寇靈州又寇涇州詔城鹽州以兵

戍之時韋臯屢破其兵俘馘三萬降其首領十二年寇
慶州及華池是歲尚結贊死明年贊普死其子足之煎
立使使來請好朝廷以其無信不受十四年韓全義破
虜於鹽州十七年寇鹽州陷麟州韋臯屢破其兵因定
昆明諸蠻臯圍維州贊普引兵十萬援之臯率南詔薄
之擒其酋獻京師明年吐蕃使論賴熱來右龍武大將
軍薛伾往報二十年贊普死詔遣使弔祭其弟嗣立使
使入朝順宗立以田景度等持節往使永貞元年來歸

金幣牛馬助崇陵憲宗初遣使者修好且還其俘其後
比年來朝貢又款隴州塞丐互市詔可十二年贊普死
遣使弔祭吐蕃使論矩立歲來朝未出境吐蕃寇宥州
與靈州兵戰不勝斬首二千級郝玘又破其兵二萬詔
留矩立等不遣十四年乃歸之吐蕃又遣兵十五萬圍
鹽州不能拔朔方將史敬奉以奇兵大破之復攻沙州
陷之穆宗即位復通使虜引兵入屯靈武靈州兵擊却
之又寇涇州長慶元年遣使來朝且乞盟詔許之盟京

師西郊又遣使就盟其國虜遣論悉諾息等入謝天子
命左衛大將軍令狐通等報之比歲使者獻金盃銀冶
犀鹿貢犂牛寶器至太和再遣使者朝五年維州守將
悉怛謀挈城以降劍南西川節度使李德裕受之州南
抵江陽岷山西北望隴山一面崖三涯江虜號無憂城
為西南要扞會牛僧儒當國議還悉怛謀歸其城吐蕃
夷誅無遺種以怖諸戎自是比五年虜使來必報所貢
有玉帶金盃獺褐犂牛尾霞氍毹馬羊橐駝贊普立幾三

十年病不事委任大臣故不能抗中國邊候晏然死以弟達磨嗣達磨嗜酒好畋獵喜內且凶愎少恩政益亂開成四年遣太子詹事李景儒往使吐蕃以論集熱來朝獻玉器羊馬自是國中地震裂水泉湧岷山崩洮水逆流三日鼠食稼人飢疫死者相枕藉鄯廓間夜聞鼙鼓聲人相驚會昌二年贊普死論贊熱等來告天子命將作監李璟弔祠無子以妃絺兄尚延力子乞離胡為贊普始三歲妃共治其國大相結都那見乞離胡不肯

拜曰贊普支屬尚多何至立絺氏子邪哭而出用事者
共殺之別將尚恐熱為落門川討擊使姓求名農力熱
猶中國號郎也譎詭善幻約三部得萬騎擊鄯州節度
使尚婢婢地至渭川與宰相尚與思羅戰薄塞思羅敗
走松州合蘇毗吐渾羊同兵八萬保洮河自守恐熱謂
蘇毗等曰宰相兄弟殺贊普天神使我舉義兵誅不道
爾屬乃助逆背國邪蘇毗等疑而不戰恐熱麾輕騎涉
河諸部先降并其衆至十餘萬禽思羅縊殺之婢婢姓

沒盧名贊心本羊同國人世為吐蕃貴相寬厚略通書記不喜仕贊普強官之三年國人以贊普立非是皆叛去恐熱自號宰相以兵二十萬擊婢婢鼓鼙牛馬橐駝聯千餘里至鎮西軍大風雷電部將震死者十餘人羊馬橐駝亦數百恐熱惡之按軍不進婢婢聞之厚幣詒書約驩恐熱大喜曰婢婢書生焉知軍事我為贊普當以家居宰相處之於是退營大夏川婢婢遣將擊之敗其兵恐熱遁明年恐熱復攻鄯州婢婢拒守恐熱兵敗

兵拏連歲不解婢婢與恐熱相持婢婢糧盡引衆趨甘
州西境以拓跋懷光居守恐熱麾下多歸之恐熱大掠
鄯廓瓜肅伊西等州所過捕戮積尸狼籍麾下咸怨欲
圖之乃揚聲將請唐兵五十萬共定其亂保渭州求冊
為贊普奉表歸唐宣宗詔太僕卿陸耽持節慰勞命涇
原靈武鳳翔邠寧振武等兵迎援恐熱既至詔尚書左
丞李景讓就問所欲恐熱倨夸自大且求河渭節度使帝
不許還過咸陽橋咄歎曰我舉大事覲得濟此河與唐

分境於是復趨落門川收散卒將寇邊會久雨糧絕恐
熱還奔廓州於是鳳翔節度使李泚復清水涇原節度
使康季榮復原州取石門等六關得人畜幾萬靈武節
度使李欽取安樂州詔為威州邠寧節度使張欽緒復
蕭關鳳翔收秦州山南西道節度使鄭涯得扶州鳳翔
兵與吐蕃戰隴州斬首五百級是歲河隴高年千餘見
闕下天子為御延喜樓賜冠帶皆爭解辯易服因詔差
賜四道兵錄有勞者三州七關地腴衍者聽民墾藝貸

五歲賦溫池委度支權其鹽以贍邊四道兵能營田者
為給牛種戍者倍其資饒再歲一代商賈往來於邊者
關鎮毋苛留兵欲墾田與民同初太宗平薛仁果得隴
上地虜李軌得涼州破吐谷渾高昌開四鎮元宗繼收
黃河磧石宛秀等軍中國無斥候警者幾四十年輪臺
伊吾屯田禾菽彌望開遠門揭候署曰西極道九千九
百示戍人無萬里行也乾元後隴右劒南西山三州七
關軍鎮監牧三百所皆失之憲宗嘗覽天下圖見河湟

舊封赫然思經略之未暇也至是羣臣奏言王者建功立業必有以光表於世者今不勤一卒血一刀而河湟自歸請上天子尊號帝曰憲宗嘗念河湟業未就而殂落今當述祖宗之烈其議上順憲二廟諡號夸顯後世又詔朕姑息民其山外諸州須後經營之明年沙州首領張義潮奉瓜沙伊肅甘等十一州地圖以獻始義潮陰結豪傑歸唐一日衆擐甲譟州門漢人皆助之虜守者驚走遂攝州事繕兵甲耕且戰悉復餘州以部校十

輩皆操挺內表其中東北走天德城防禦使者齎詔收
慰擢義潮沙州防禦使俄號歸義軍遂為節度使其後
河渭州虜將尚延心以國破亡亦獻款秦州刺史高駢
誘降延心及渾末部萬帳遂收二州拜延心武衛將軍
駢收鳳林關以延心為河渭等州都遊奕使咸通二年
義潮奉涼州來歸七年北廷回鶻僕固俊擊取西州收
諸部鄯州城使張季顥與尚恐熱戰破之收器鎧以獻
吐蕃餘衆犯邠寧節度使薛弘宗卻之會僕固俊與吐

蕃大戰斬恐熱首傳京師八年張義潮入朝為右神武
統軍賜第及田命族子淮深守歸義十三年卒沙州以
長史曹義金領州務遂授歸義節度使後中原多故王
命不及甘州為回鶻所并歸義諸城多沒渾末亦曰唃
末吐蕃奴部也虜法出師必發豪室皆以奴從平居散
處耕牧及恐熱亂無所歸共相嘯合數千人以唃末自
號居甘肅瓜沙河渭岷廓疊宕間其近蕃牙者最勇而
馬尤良云唐末瓜沙之地復為所隔然吐蕃自是衰弱

族種分散大者數千家小者百十家無復統一矣自儀
渭涇原環慶及鎮戎秦州暨於靈夏皆有之各有首領
內屬者謂之熟戶餘謂之生戶涼州雖為所隔然其地
自置牧守或請命於中朝



文獻通考卷三百三十四

欽定四庫全書

史部

文獻通考卷三百三十五
六

詳校官閣學士_臣瑞保

編修_臣程嘉謨覆勘

覆校官中書_臣孫希旦

校對官中書_臣田尹衡

謄錄監生_臣沈方大

欽定四庫全書

文獻通考卷三百三十五

鄱陽馬端臨貴與著

四裔考十二

吐蕃

梁開平二年遣使朝貢官其首領後唐天成二年遣使
者野利延孫等入貢并蕃僧四人持蕃書二封人莫識
其字其後權知西涼府留後孫超遣大將拓跋承誨來

貢明宗召見承誨云涼州東距靈武千里西北至甘州
五百里舊有鄆人二千五百為戍卒及黃巢之亂遂為
阻絕今城中漢戶百餘皆戍兵之子孫衣服言語畧如
漢人又言涼州郭外數十里尚有漢民陷沒者耕作餘
皆吐蕃詔授超涼州刺史河西軍節度使留後漢乾祐
初超卒州人推其土人折逋嘉施權知留後遣使來貢
即以嘉施代超為留後周廣順二年始以申師厚為河
西節度師厚初至涼州奏授吐蕃首領折逋支等官從

之顯德中師厚為其所迫擅還朝坐貶涼州亦不復命
帥宋建隆二年靈武五蕃以橐駝良馬致貢來離等八
族蕃越寇護送入界勅書獎諭又賜秦州首領尚波于
錦袍銀帶尚波于感悅是年牧獻伏羌地乾德四年知
西涼州折逋葛皮上言有回鶻二百餘人漢僧六十餘
人自朔方路來為部落劫掠僧云欲往天竺取經並送
達甘州訖詔褒答之八年秦州大石小石族寇土門掠
居民知州張炳擊走之太平興國二年秦州諸族數入

寇俱擊敗之斬首數十級下詔戒勵之八年諸種以馬來獻召其酋長對崇政殿厚加慰撫賜以束帛九年秦州言蕃部以羊馬來獻詔以茶綵答其值淳化元年秦州大小馬家族獻地內附至道元年七月西涼府押蕃落副使折逋喻龍波上言蕃部頻為繼遷侵掠乃與吐蕃都部署沒臨拽于會六谷蕃衆來朝且獻名馬上厚賜之是歲涼州復來請帥詔以丁惟清知州事賜以牌印咸平元年十一月河西軍左廂副使歸德將軍折逋

游龍鉢來朝龍鉢四世受命為首雖貢方物未嘗自行
今始至獻馬二千餘匹河西軍即古涼州東至故原州
千五百里南至雪山土谷渾蘭州界三百五十里西至
甘州同城界六百里北至部落三百里周廻平州二千
里舊領姑臧神鳥蕃禾昌松嘉麟五縣戶二萬五千六
百九十三口十二萬八千一百九十二今有漢民三百
戶城周廻五十里如鳳形相傳李軌舊治也皆龍鉢自
述云詔以龍鉢為安遠大將軍三年以儀州延蒙八部

都首領渴哥領化州刺史首領透逋等為懷化郎將四年知鎮戎軍李繼和言西涼府六谷都首領潘羅支願戮力討繼遷請授以刺史仍給廩祿羅支貢馬五千匹詔厚給馬價別賜茶綵六年原渭蕃部三十二族納質來歸羅支又遣蕃官吳福聖鵬來貢表言感朝廷恩信憤繼遷倔强已集騎兵六萬乞會王師收復靈州乃以羅支為朔方軍節度靈州西面都巡檢使賜以鎧甲器幣又以吳福聖臘為定遠將軍次首領兀佐等七人為懷

化將軍羅支屢請王師助擊賊議者以西涼去渭州限
河路遠不可豫約師期上曰繼遷常在地中三山之東
每來寇邊及官軍出則已遁去使六谷部族近塞捍禦
與官軍合勢亦國家之利降詔許之六月知渭州曹瑋
言隴山西延蒙族首領禿逋等納馬立誓乞隨王師討
賊以漢法治蕃部瑋稱其忠詔授本族軍主八月者龍
族首領來貢名馬上嘉其嘗與潘羅支協力抗賊令優
待之其年十一月繼遷攻西蕃遂入西涼府知州丁惟

清陷沒羅支偽降未幾集六谷諸豪及者龍族合擊繼
遷大敗中流矢死景德元年二月羅支遣其甥廝陀完
來獻捷六月又遣其兄邦逋支入奏且欲更率部族及
回鶻精兵直抵賀蘭山討除殘孽願發大軍援助即詔
涇原部署陳興等俟羅支已發兵馬率衆鼓行赴石門
策應邦逋支又言前賜羅支牌印官誥衣服器械為遷
賊劫掠有詔別給羅支又言修洪元大雲寺詔賜金箔
物綵先是繼遷種落迷般囑及日逋吉羅丹二族亡歸

者龍族而欲陰圖羅支是月會遷黨攻者龍羅支率百餘騎急赴將議合擊遂為二族戕於帳詔贈羅支武威郡王遣使贈卹其家諸豪議立羅支弟廝鐸督為首領詔授鐸督鹽州防禦使靈州西面沿邊都大巡檢使上以遷黨未平藉其腹背攻刺遂加鐸督朔方軍節度押蕃落等使右隰州言河西諸蕃四十五族內附其年遷黨寇永寧寨為藥令族合蘇擊敗之斬首百餘級三年廝鐸督遣使入貢仍上與趙德明戰鬥功狀詔嘉獎之

加檢校太傅渭州言妙娥延家熟魏等族率三千餘帳
萬七千餘口及羊馬數萬款塞內附詔遣使撫勞之賜
以袍帶茶綵仍以折平族首領撒逋渴為順州刺史充
本族都軍主是年宗家當宗章迷族來貢移逋擦父族
歸附九月詔釋西面納質戎人先是諸蕃有鈔劫為惡
嘗經和斷者恐異時復叛故收其子弟為質乃有禁錮
終身者上憫而縱之族帳感恩皆稽首誓不為邊患四
年邊臣言趙德明謀劫西涼襲回鶻上以六谷甘州久

推忠順思撫寧之乃遣使諭廝鐸督令援結回鶻為備
并賜鐸督茶藥襲衣金帶及部落物有差鐸督奉表謝
七年知秦州張佶置大路門新寨先是佶欲近渭置採
木場蕃族聞之即徙帳去佶不能遂撫之戎人輒悔因
鄉導鈔劫佶深入掩擊悉敗走至是求和佶不許時宗
哥立遵喃廝囉溫逋奇等帳族甚盛勝兵六七萬與趙
德明抗敵希望朝廷恩命佶奏請拒絕涇原鈐轄曹瑋
又言宜厚喃廝囉以扼德明八年會廝囉遣使來貢詔

賜錦袍金帶器幣供帳什物茶藥有差凡中金七千兩
他物稱是其年哨廝囉宗哥文法聚衆數十萬請討平
夏以自効上以為戎人多詐慮緩急侵寇及擾熟戶即
命周文質監涇原軍曹瑋知秦州兼兩路沿邊安撫使以
備之宗哥城東南至永寧寨九百一十五里東北至西
涼府五百里西北至甘州五百里東至蘭州三百里南
至河州四百一十五里又東至龕谷五百五十里又西
南至青海四百里又東至新渭州千八百九十里九年

廝囉立遵等獻馬五百八十二匹詔賜幣總萬二千計以答之是年以宗哥族李遵為保順軍節度賜襲衣金帶器幣遵一名郢成佐喃廝囉甚有威名性貪忍其下怨而懼之屢表求贊普號朝廷以為贊普戎王也遵居廝囉下不應妄授乃用廝鐸恩例焉其後或比歲或間歲朝貢不絕李遵或曰李立遵為論逋佐喃廝囉論逋者相也立遵貪且喜殺戮國人不附其後舉兵與瑋戰三都谷不勝又襲西涼為所敗廝囉遂與立遵不協更

徙邈川以溫逋奇為論逋數使人至秦州求內屬明道
初即授廝囉寧遠大將軍愛州團練使授逋奇歸化將
軍已而逋奇為亂囚廝囉置穽中出收不附已者守穽
人間出之廝囉集兵殺逋奇徙居青唐景祐中以廝囉
為保順軍節度觀察留後歲以奉錢令秦州就賜元昊
始強侵掠其界兵臨河湟廝囉知眾寡不敵壁鄯州不
出陰間元昊頗得其虛實元昊已度河插幟志其淺廝
囉潛使人移植深處以誤元昊及大戰元昊潰而歸士

視幟渡溺死者十八九所鹵獲甚衆自是數以奇計破
元昊元昊遂不敢窺其境及元昊取西涼府潘羅支舊
部往往歸廝囉又得回紇種人數萬廝囉居鄯州西有
臨谷城通青海高昌諸國蕃商皆趨鄯州貿易以故富
強寶元元年加保順軍節度使仍兼邈川大首領時以
元昊反遣左侍禁魯經持詔諭廝囉使背擊元昊以披
其勢賜帛二萬疋經還以勞擢閣門祗候廝囉奉詔出
兵四萬五千向西涼西涼有備廝囉知不可攻捕殺遊

邏數十人亟還聲言圖再舉元昊既屢寇邊仁宗召對
曾經欲再遣經固辭貶經為左班殿直募敢使者屯田
員外郎劉渙應詔渙至廝囉迎導供帳甚厚介騎士為
先驅引渙至庭廝囉冠紫羅氍冠服金線花袍黃金帶
絲履平揖不拜延坐勞問稱阿舅天子安否道舊事則
數十二辰屬曰兔年如此馬年如此云渙傳詔已廝囉
召酋豪大犒約盡力無身然終不能有大功後累加恩
兼保順河西節度使洮涼兩州刺史又加階勲檢校官

功臣食邑賜器幣鞍勒馬嘉祐三年捺羅部阿作等叛
廝囉歸諒祚諒祚乘此引兵攻掠境上廝囉與戰敗之
獲酋豪六人收橐駝戰馬頗衆因降隴逋立功馬波三
大族會契丹遣使送女妻其少子董璫乃罷兵歸治平
二年夏羌邈奔及阿叔溪心以隴珠珂諾三城叛諒祚
歸廝囉廝囉不禮乃復歸諒祚請兵還取所獻地諒祚
以兵隨之不能克但收邈川歸丁家五百餘帳而還廝
囉其年十月三日卒以三年五月二日葬年六十九董

檀嗣廝囉三妻生董檀者曰喬氏其二妻李立遵女生
瞎檀及磨檀角立遵死李氏寵衰斥為尼置鄜州錮其
子瞎檀磨檀角結母黨李巴全竊載其母奔宗哥廝囉
不能制磨檀角因撫有其衆李氏以寶元二年恩賜紫
衣磨檀角亦累奉貢初補嚴州團練使以思州團練使
卒所部立其子瞎撒欺丁李氏懼孤弱不能守乃獻皮
帛入庫廩文籍於廝囉廝囉因受之嘉祐三年命欺丁
為順州刺史瞎檀居龕谷屢通貢授澄州團練使先卒

子木征不能自立青唐族酋瞎藥雞囉及僧鹿遵迎居
洮州欲立以服洮岷疊宕武勝軍諸羌秦州以其近邊
逐之乃還河州後徙安江城董氊雖羈屬之不能有也
母弟瞎吳叱居銀川鼎家山至和二年補本族副軍主
於是唃氏地分為三董氊居青唐獨有河北之地然最
強其國大抵吐蕃遺俗懷恩惠重財貨無正朔市易用
五穀乳香硃砂罽毯馬牛以代錢帛用虎豹皮緣衣裘
尊釋氏不知醫藥疾病召巫覡視之焚柴聲鼓謂之逐

鬼信詛咒或以決事訟有疑使詛之訟者上辭牘藉之以帛事重則以錦亦有鞭笞桎械諸獄具人喜啖生物無蔬茹醢醬獨知用鹽為滋味而嗜酒及茶居板屋富室以氊為幕貢獻謂之般次云神宗即位加董氊太保太傅以其子蘭逋叱為錦州刺史三年夏人寇環慶董氊乘虛入其境大獲賜璽書袍帶激獎之時王韶上平戎策謂國家欲平西夏當復河湟則西夏有腹背受敵之憂今古渭之西熙河蘭鄯皆漢隴西等郡董氊雖國

其間而不能制諸羌宜并有之以絕夏人右臂詔以韶
為秦鳳沿邊安撫使既定熙河其首領青宜結鬼章寇
河州白踏城景思立死焉帝命邊臣招來之十年以鬼
章及阿里骨皆為刺史董氊入貢賜以銀綵茶服改西
平軍節度使元豐四年王師討夏國會其兵董氊遣酋
長秣征尊率三萬人赴黨龍耳江及隴朱珂諾又集六
部兵十二萬約以八月分三路與官軍會帝以其協濟
軍威事功可紀由常樂郡公進封武威郡王鬼章阿里

骨黨令支皆團練使心牟欽羶阿星李叱臘欽為刺史
夏人與之通好許割賂斫龍以西地云如歸我即官爵
恩好一如所欲董羶拒絕之訓整兵甲以俟入討且以
蕃字來告神宗召見其使使歸語董羶盡心守圉每稱
其上書情辭忠智雖中國士大夫存心公家者不過如
此知邈川事力固不足與夏人抗但欲解散其謀使不
與結和而已故終不能有大功哲宗立加檢校太尉元
祐元年卒蘭逋叱已死養子阿里骨嗣阿里骨本于闐

人少從其母給事董種故養為子既嗣事遣使修貢元祐元年授冠軍大將軍檢校司空河西軍節度使封寧塞郡公二年里骨逼鬼章使率衆據洮州八月鬼章就擒檻送京師詔赦之明年里骨奉表謝罪詔熙河無復出兵許貢奉如故又加其官紹聖元年來獻獅子厚賜還之二年卒子瞻征嗣授以父官瞻征嗜殺部曲睽貳大酋心年欽種之屬有異志忌瞻征季父蘇南黨征雄勇多智共誣其謀逆瞻征不能察而殺之盡誅其黨獨

錢羅結逃奔溪巴溫溪巴溫者董璫疎族也自阿里骨之立去依隴逋部河南諸羌多歸之錢羅結奉溪巴溫長子杓梭據溪哥城瞎征討殺杓梭錢羅結奔河州說王瞻以取青唐之策已而溪巴溫入溪哥城自稱王子元符二年七月瞻取邈川八月瞎征自青唐脫身來降欽璫迎溪巴溫入青唐立其子隴梭為主八月瞻軍至青唐隴梭出降詔以邈川為湟州青唐為鄯州二酋雖然其種人本無歸漢意議者謂今不先修邈川以東城

障而遽取青唐非計也閏九月欽羶等果與青唐城中人相結謀復奪城山南諸羌亦叛瞻遣將破之青唐圍解而邈川益急夏人十萬助之總管王愍苦戰固守乃免瞻棄青唐歸溪巴溫與其子溪賒羅撒據之朝論請并棄邈川且謂董氊無後趙懷義乃木征之子喃廝囉嫡曾孫最為親的於是以隴拶為河西軍節度使知鄯州封武威郡公克西蕃都護依府州折氏例世世承襲尋賜姓名趙懷德以懷義為廓州團練使同知湟州加瞻

征檢校太傅懷遠軍節度使三年三月懷德隴穆及所
降契丹夏國回鶻公主入見皆蕃服蕃拜各賜冠服退
易之於邇英閣前復立班謝賜食於橫門徽宗命輔臣
呼懷德與詔問何以招致溪巴溫對曰譬如乳牛繫其
子即母須來繫其母即子須來至岷州當遣人往諭使
之歸漢遂與瞎征俱還湟州溪賒羅撒謀襲殺懷德懷
德奔河南瞎征不自安求內徙詔居鄧州崇寧元年卒
三年王厚復湟鄯懷德至京師拜感德軍節度使封安

化郡王趙思忠即瞎驪之子木征也嘉祐中為河州刺史其後河州武勝軍諸族浸驕閉于閫諸國朝貢詔邊將問罪會王韶經畧熙河招納蕃部遣僧智緣往說之啖以厚利因隨以兵前後殺其老弱數千焚帳族萬數得腹心首領十餘人又離其妻子皆不殺木征拒戰敗北遂以熙寧七年四月舉洮河二州來降賜今姓名拜榮州團練使封其母妻及諸子皆超拜官其後以思忠為秦州鈐轄不蒞事而乞主熙河蕃部經畧司以為不

可詔於二州給地五十頃十年遷合州防禦使卒贈鎮
洮軍節度觀察留後建炎初錢蓋制置陝西上言青唐
無毫髮之得而所費不貲請求唃氏後而立之必得其
力乃以蓋為陝西總制使持告賜趙懷恩懷恩者董氐
從孫懷德之弟益麻黨征也議者以為蕃部所推伏故
賜姓名封為隴西郡王

四朝國史論曰吐蕃之裔守護西塞為不侵不叛之
臣嘗宣力王家奮擊夏虜而熙寧元符崇寧間三用

師於其國蓋其始也王安石主王韶取洮河中而章
惇主王瞻夷青唐末而蔡京主王厚復湟鄯遂建熙
河一道郡縣而置之功雖訖成邊患不息唃氏子孫
無罪而就覆亡及金人得秦隴乃能求其後而續其
血食孰謂金無人哉

大羊同

大羊同東接吐蕃西接小羊同北直于聞東西千餘里
勝兵八九萬人其人辮髮羶裘畜牧為業地多風雪冰

厚丈餘所出物產頗同蕃俗無文字但刻木結繩而已

刑法嚴峻其酋豪死挾

於穴反

去腦實以珠玉剖其五臟

易以黃金假造金鼻銀齒以人為殉卜以吉辰藏尸巖
穴他人莫知其所多殺牝牛羊馬以充祭祀葬畢服除
其王姓姜葛有四大臣分掌國事自古未通中國唐貞
觀十五年遣使來朝

悉立

悉立在吐蕃西南戶五萬有城邑村落依溪澗丈夫以

繒絲纏頭衣氍褐婦人辮髮著短裙以蒸報為俗畜多
水牛殺羊雞豕穀宜秔稻麥豆饒甘蔗諸果死葬於中
野不為封樹喪制以黑為衣一年就吉刑有剗劓羈事
吐蕃自古未通中國唐貞觀二十年遣使貢方物

章求拔

章求拔或云章揭拔本西羌種也在悉立西南居山之
內近代移出西接東天竺遂衣服變西羌之俗其地延
袤八九百里勝兵二千餘人居無城郭好為寇掠商旅

患之聞悉立入朝亦遣使朝貢

泥婆羅

泥婆羅國在吐蕃西其俗剪髮與眉齊穿耳瑠瑱竹簞
緩至肩者以為姣麗食用手其器皆銅多商賈少田作
以銅為錢面文為人背文為馬其牛鼻不穿孔衣服以
一幅布蔽身數自盥漱以板為屋壁皆雕畫俗重博戲頗
解推測盈虛兼通歷術事五天神鑿石為像每日清水
浴神烹羊而祭其王那陵提婆身著珍珠諸寶耳垂金

鈎玉璫佩寶裝伏突坐獅子坐常散花燃香大臣及左右並坐於地有阿耆婆滿池周迴二十餘步以物投之即生煙焰懸釜而炊須臾而熟唐永徽二年遣使朝貢

大勃律

大勃律或曰布露直吐蕃西與小勃律接西隣北天竺烏耆地宜鬱金役屬吐蕃唐萬歲通天逮開元時三遣使者朝故冊其君蘇弗舍利支離泥為王死又冊蘇麟陀逸之嗣王凡再遣大首領察卓那廝摩沒勝入謝沒

謹忙死子難泥立死兄麻來兮立死蘇失利之立為吐
蕃陰誘妻以女故西北二十餘國皆臣吐蕃貢獻不入
安西都護三討之無功天寶六載詔副都護高仙芝伐
之前遣將軍席元慶馳千騎見蘇失利之曰請假道趨
大勃律城中大酋五六皆吐蕃腹心仙芝約元慶吾兵
到必走山出詔書召慰賜繒綵縛首領待我元慶如約
蘇失利之挾妻走不得其處仙芝至斬為吐蕃者斷婆
夷橋是暮吐蕃至不能救仙芝約王降遂平其國於是

拂菻大食諸胡七十二國皆震恐咸歸附執小勃律王
及妻歸京師詔改其國號歸仁置歸仁軍募千人鎮之
帝赦蘇失利之不誅授右武衛將軍賜紫袍黃金帶使
宿衛

箇失蜜

箇失蜜或曰迦濕彌邏北距勃律五百里環地四千里
山回繚之他國無能攻伐王治撥邏勿還布邏城西瀕
彌那悉多大河地宜稼多雪不風出火珠鬱金龍種馬

俗毛褐世傳地本龍池龍徙水竭故往居之唐開元初遣使者朝八年詔冊其主真陀羅秘利為王間獻胡藥天木死弟木多筆立遣使者佛理多來朝且言有國以來並臣天可汗受調發國有象馬步三種兵臣身與中天竺王阼吐蕃五大道禁出入戰輒勝有如天可汗兵至勃律者雖衆二十萬能輸糧以助又國有摩訶波多磨龍池願為天可汗營祠因丐王冊鴻臚譯以聞詔內物理多宴中殿賜賚優備冊木多筆為王自是職貢有

常其役屬五種亦名國所謂咀乂始羅者地二千里有
都城西南餘七百里得僧訶補羅地三千餘里亦治都
城東南山行五百里得烏刺尸地二千里有都城宜稼
穡東南限山千里即箇失蜜西南行險七百里得半笊
蹉地二千里又得曷羅闍補羅者其大四千里有都城
多山阜人驍勇五種皆無君長云

骨咄

骨咄或曰珂咄羅廣長皆千里王治思助建城多良馬

赤豹有四大鹽山山出烏鹽唐開元十七年王俟斤遣子骨都施來朝二十一年王頡利發獻女樂又遣大首領多博勒達于朝貢天寶十一載冊其王羅金節為葉護

蘇毗

蘇毗本西羌族為吐蕃所并號孫波在諸部最大東與多彌接西距鵲莽硤戶三萬唐天寶中王沒陵贊欲舉國內附為吐蕃所殺子悉諾率首領奔隴右節度使哥

舒翰護送闕下元宗厚禮之多彌亦西羌族役屬吐蕃
號難磨濱犂牛河土多黃金貞觀六年遣使者朝貢賜
遣之伊吾城者漢宜禾都尉所治商胡雜居勝兵千附
鐵勒人驍悍土良沃隋末內屬置伊吾郡天下亂復臣
突厥貞觀四年城酋來朝頡利滅舉七城降列其地為
西伊州

沙州

沙州本漢燉煌故地唐天寶末陷於西戎大中五年張

義潮以州歸順詔建沙州為歸義軍以義潮為節度使
領河沙甘肅伊西等州觀察營田處置使義潮入朝以
從子惟深領州事至朱梁時張氏之後絕州人推長史
曹義金為帥義金卒子元忠嗣周顯德二年來貢授本
軍節度檢校太尉同中書門下平章事鑄印賜之宋建
隆三年加兼中書令子延恭為瓜州防禦使興國五年
元忠卒子延祿遣人來貢贈元忠燉煌郡王授延祿本
軍節度弟延晟為瓜州刺史延瑞為衙內都虞候咸平四

年封延祿譙郡王五年延祿延瑞為從子宗壽所害宗壽
權知留後而以其弟宗允權知瓜州表求旌節乃授宗
壽節度使宗允檢校尚書左僕射知瓜州宗壽子賢順
為衙內都指揮使大中祥符末宗壽卒授賢順本軍節
度弟賢惠為檢校刑部尚書知瓜州賢順表乞金字藏
經洎茶藥金箔詔賜之至天聖初遣使來謝貢乳香硃
砂玉團自景祐至皇祐中凡七貢方物

西夏

本末已見封建考

文獻通考卷三百三十五

欽定四庫全書

文獻通考卷三百三十六

鄱陽馬端臨貴與著

四裔考十三

西域總序

西域以漢孝武時始通本三十六國皆在匈奴之西烏
孫之南南北有大山中央有河東西六千餘里東則接
漢阨以玉門陽關

二關並在
燉煌郡

西則限以葱嶺諸國大率

土著有城郭田畜與烏孫異故皆役屬匈奴西邊日逐

王領西域賦稅取足焉其南山東出金城

今金城會寧安鄉西平等

即漢金城郡地

與漢南山屬焉

屬聯也

自玉門陽關出西域有兩

道西踰葱嶺則出大宛康居奄蔡焉者自張騫開西域

之迹其後霍去病擊破匈奴右地降渾邪休屠王遂空

其地始築令居以西

今西平郡之西北

初置酒泉郡後稍發徙

人充實之分置武威張掖燉煌酒泉四郡據兩關焉自

李廣利伐大宛之後西域震懼多遣使來貢獻於是東

自燉煌西至鹽澤

即蒲昌海在今交河北庭界中

往往起亭障是時軍

旅連出師行二三十年海內虛耗征和中貳師李廣利

以軍降匈奴帝既悔遠征伐而搜粟都尉桑弘羊與丞

相御史奏言故輪臺以東捷枝渠犂皆故國地

輪臺渠犂地名

今在交河北庭界中其地相連

廣饒水草有溉田五千頃以上處溫和

田美可益通溝渠種五穀與中國同時熟田一歲有積

穀募人壯健有累重敢徙者詣田所

累重謂妻小家屬

就畜積

為本業益墾溉田稍築列亭連城而西以威西國帝深

陳既往之悔乃不復出軍昭帝時乃用桑弘羊前議以
給外國使者至宣帝遣衛司馬使護鄯善以西數國及
破姑師未盡殄分以為車師前後王及山北六國時漢
獨護南道未能盡并北道也神爵三年匈奴日逐王來
降護鄯善以西使者鄭吉迎之乃因使鄭吉併護北道
故號曰都護都護之起自吉置矣由此匈奴益弱不能
近西域於是徙屯田於北胥鞬披莎車之地屯田校尉
始屬都護都護督察烏孫康居諸外國都護治烏壘城

去陽關二千七百里與渠犂田官相近土地肥饒

於西域中故治焉至元帝復戊巳二校尉屯田於車師

前王庭

戊巳中央鎮覆四方又開渠播種以為厭勝故稱戊巳焉

哀平間自相分割

為五十五國凡國自譯長城長君監史大祿伯長千長

都尉且

子餘反

渠當戶將相至侯王皆佩漢印綬凡三百

七十六人而康居大月氏安息罽賓烏弋之屬皆以絕

遠不在數中其來貢獻則相與報不督錄總領也至王

莽時四邊擾亂與中國遂絕並復役屬匈奴前往西域

有二道自元始以後有三道從玉門關出西經婁羌

而姑

遮反轉西域葱嶺經懸度入大月氏為南道從玉門關西

出發都護并迴三隴沙北頭經居盧倉從沙西北過龍

堆到故樓蘭轉西詣龜茲至葱嶺為中道從玉門關西

北出經橫坑辟三隴沙及龍堆出五船皆到車師界戊

巳校尉所理高昌轉西與中道合龜茲新道後漢永平

中匈奴乃脅諸國共寇河西郡縣

今武威張掖等郡地

城門晝閉

明帝乃命將北征匈奴取伊吾廬地

今伊吾縣

置宜禾都尉

以屯田遂通西域于闐諸國西域自絕六十五載乃復
通焉明年始復置都護戊巳校尉及明帝崩焉耆龜茲
攻沒都護陳睦匈奴車師圍戊巳校尉章帝不欲疲敝
中國以事邊徼乃迎還戊巳校尉不復遣都護復罷屯
田匈奴因遣兵守伊吾地時軍司馬班超留于闐綏集
諸國和帝永光初竇憲大破匈奴因遣副使尉閭盤掩
擊伊吾破之三年班超遂定西域因以超為都護居龜
茲復置戊巳校尉於是五十餘國悉納質內屬其條枝

安息諸國至於海濱四萬里外皆重譯貢獻九年班超遣掾甘英窮臨西海而還皆前代所不至莫不備其風土傳其珍怪焉及班超被徵以任尚為都護尚謂超曰猥承君後宜有以誨之超曰塞外吏士本非孝子順孫皆以罪過徙補邊屯而蠻夷懷鳥獸之心難養易敗今君性嚴急水清無大魚察政不得下和宜蕩佚簡易寬小過總大綱而已尚不能從數年至安帝初西域背叛如超所言頻攻都護任尚段禧等朝廷以為險遠難相

應赴詔罷都護自此遂棄西域北匈奴即復收屬諸國
共為邊患十餘歲燉煌太守曹崇請出兵擊匈奴復欲
進取西域鄧太后不許但令置護西域副校尉居燉煌
羈縻而已其後匈奴連與車師入寇河西漢不能禁議
者因欲閉玉門陽關以絕其患尚書陳忠上疏曰臣聞
八蠻之寇莫甚北虜高祖窘平城之圍文帝屈供奉之
恥故孝武憤怒深惟久長之計命遣武臣浮河絕漠窮
破虜庭遂開西河四郡以隔絕南羌收三十六國斷匈

奴右臂是以單于孤特竄跡遠藏由此觀之戎狄可以
威服難以化狎西域內附日久區區東向叩關者數矣
此其不樂匈奴慕漢之效也今北虜已破車師勢必南
攻鄯善棄而不救則諸國從矣若然則虜財賄日增膽
勢益殖威臨南羌與之交連如此河內四郡危矣不得
不救則百倍之役興不訾之費發矣議者但念西國絕
遠卹之煩費不見先代苦心勤勞之意也臣以為燉煌
宜置校尉按舊增四郡屯兵以西撫諸國庶足以折衝

萬里震怖匈奴太后又召班超之子勇問之勇議曰昔
者孝武皇帝患匈奴強盛開通西域諸國論者以為奪
匈奴府藏斷其右臂遭王莽篡盜徵求無厭胡夷憤毒
遂以背叛光武中興未遑外事故匈奴負強驅率諸國
及至永平再攻燉煌河西郡城門晝閉帝命武臣出征
西域故匈奴遠遁邊境得安及至永元莫不內屬會間
者羌亂西域復絕北虜遂遣責諸國備其逋租高其價
直嚴其期會鄯善車師皆懷忿怒思樂事漢其路無從

前所以時有叛者皆由牧養失宜還為其害舊燉煌郡有營兵三百人宜復之復置護西域副校尉居於燉煌如永元故事又宜遣西域長史將五百人屯樓蘭西當馬耆龜茲徑路南強鄯善于闐心膽北扞匈奴東近燉煌如此誠便長樂衛尉鐔顯等難曰朝廷前所以棄西域者以其無益於中國而費難供也今車師已屬匈奴鄯善不可保信一朝反覆班將軍能保北虜不為邊害乎勇對曰今中國置州牧者以禁郡縣姦猾盜賊也若

州牧能保盜賊不起者臣亦願以腰斬保匈奴之不為
邊害也今通西域則虜勢必弱虜勢弱則為患微矣孰
與歸其府藏續其右臂哉為置校尉以扞北撫西設長
史以招懷諸國若棄而不立則西域屈就北虜緣邊之
郡將受困苦河西城門復有晝閉之警矣今不廓開朝
廷之德而拘屯戍之費若北虜遂熾豈安邊久長之策
哉太尉屬毛軫難曰今若置校尉則西域絡繹遣使求
索無厭與之則費難供不與則失其心一朝為匈奴所

迫當復求救則為役大矣對曰今設以西域歸匈奴而使其因西域租入之饒兵馬之衆以擾動緣邊是為富仇讐之財增暴夷之勢也置校尉者宣威布德以繫諸國內向之心以疑匈奴覬覦之情而無費財耗國之慮也且西域之人無他求索其來入者不過廩食而已今若拒絕勢必北屬夷虜并力以寇并涼則中國之費不止十億於是從忠勇議乃以勇為西域長史將五百人西屯柳中

今交河郡縣

勇遂破平車師自建武至於延光西

域三絕復通順帝永建二年勇復擊降焉耆於是龜茲
疏勒于闐莎車等十七國皆來服從而烏孫葱嶺以西
遂絕六年帝以伊吾舊膏腴之地傍近西域匈奴資之
以為鈔暴復令開設屯田如永元時事置伊吾司馬一
人自陽嘉以後朝威稍損諸國驕放轉相陵伐矣自魏
及晉中原多故西域朝貢不過三數國焉至後魏太武
帝使董琬使西域還且言其地為三域自葱嶺以東流
沙以西為一域姑墨以南月氏以北為一域兩海之間

水澤以南為一域三域之內諸小渠長蓋以百數其出西域更為四道自玉門流沙西行二千里至鄯善為一道自玉門度流沙北行二千二百里至車師為一道從莎車西行一百里至葱嶺西千三百里至伽部為一道自莎車西南五百里至葱嶺西南千三百里至波路為一道焉於是貢獻者十有六國孝文延興中尚書奏以燉煌一鎮界遠西北寇賊路衝慮或不固欲移就涼州羣官會議給事中韓秀曰此蹙境之事非闢土之宜燉

煌之立其來久矣雖土臨強寇而兵人素習縱有姦竊不能為害循常置戍足以自全進斷北狄之覘途退塞西夷之闕路若徙就姑臧慮人懷異意或貪留重遷情不願徙脫引寇內侵深為國患且燉煌去涼州三千里捨遠就近防制有關一朝廢置是啓戎心則夷狄交構互相來往恐醜徒協契竊侵涼土邊役煩興艱難方甚乃從秀議隋煬帝時遣侍御史韋節司隸從事杜行滿使於西蕃諸國至罽賓得瑪瑙杯王舍城得佛經史國

得十舞女獅子皮火鼠毛而還帝復令裴矩於武威張掖間往來以引致之皆啗以厚利令轉相諷諭大業中相率而來朝者四十餘國帝因置西戎校尉以應接之自燉煌西出玉門陽關涉鄯善北通伊吾千里自伊吾北通車師前部高昌壁千二百里自高昌壁北通車師後部金滿城今北庭府縣五百里此其西域之門戶內地故漢戍已校尉更互屯焉伊吾地宜五穀桑麻蒲萄其北及柳中皆膏腴之地故漢帝與匈奴爭車師伊吾以制

西域至隋有商胡雜居勝兵千餘人附於鐵勒人甚驍悍厥田良沃隋末內屬置伊吾郡屬天下亂又臣突厥唐貞觀四年以頡利破滅遂舉其屬七城來降因列其地為西伊州同於編戶至武太后如意初武威軍總管王孝傑大破吐蕃復龜茲于闐疏勒碎葉四鎮自是諸國朝貢倂於前代矣神龍以後黑衣大食強盛漸并諸國至於西海分兵鎮守焉杜佑族子環隨鎮西節度使高仙芝西征天寶十載至西海寶應初因賈商船舶自廣州而同著經行記今之所纂其小國無異聞者則

不暇錄焉

諸家纂西域志多引諸僧遊歷傳記如法明遊天竺記支僧載外國事法盛歷諸國傳道

安西域志及佛國記曇勇外國傳智猛外國傳支曇諦烏山銘翻經法師外國傳之類皆盛論釋氏詭異奇跡參以他書則皆紕繆故多畧焉

樓蘭

即鄯善

樓蘭在婁羌西北漢時通焉王治杆泥城去陽關千六百里東去長安六千一百里戶千五百西北去都護治所千八百里至山國千三百餘里

此國山居故名山國

西北至車

師千九百里地沙鹵少田寄田仰穀旁國多出葭葦

檉柳胡桐白草

白草牛馬所嗜也胡桐似桐蟲食其樹而沫下流出者俗名為胡桐淚可以汗

金銀人隨畜牧逐水草有驢馬多橐駝能作兵器與姑羌

同漢武帝因張騫之言甘心欲通大宛諸國一歲中多

至十餘輩樓蘭姑師當道苦之

每給使者受其勞費故厭苦也

攻剽漢

使王恢等漢將趙破奴率屬國騎

謂諸外國屬漢者

及郡兵擊

之虜樓蘭王遂破姑師於是列亭障至玉門矣樓蘭既

降服貢獻匈奴聞發兵擊之於是樓蘭遣一子質漢後

貳師將軍擊大宛便道引兵捕樓蘭王將詣闕簿責王

對曰小國在大國間不兩屬無以自安願徙國入於漢
地上直其言遣歸國樓蘭王死後王立樓蘭國最東垂
近漢當白龍堆乏水草常主發導負米擔糧送迎漢使
又數為吏卒所懲艾不便與漢通後復為匈奴反間數
遮漢使昭帝遣平樂監傅介子往刺其王懸首北闕下
乃立其弟尉屠耆為王更名其國為鄯善王自請天子
曰身在漢久今歸單弱而前王有子在恐為所拒國中
有伊循城其地肥美願漢遣一將屯田積穀令臣得依

其威重於是漢遣司馬一人吏士四十人田伊循以鎮撫之其後置都尉伊循官置始此矣鄯善當漢道衝西通且末

且此
余反

七百二十里自且末以往皆種五穀土地

草木產畜作兵畧與漢同自後無聞至後魏太延時鄯善王遣其弟入侍及太武平涼州沮渠無諱度流沙遣其弟安周擊鄯善王比龍恐懼欲降會魏使自天竺罽賓至鄯善勸比龍拒之連戰安周不能克而退後比龍懼率衆西奔且末其世子乃應安周太武討平之拜

交趾公韓杖為假節征西將軍領護西戎校尉鄯善王
以鎮之賦役其人比之郡縣然其後部落遂後屬於且
末西魏大統八年其王允鄯來率衆內附

且末

且末國漢時通焉王治且末城去長安六千八百里戶
二百三十西北至都護治所二千二百里北接尉犁丁
零東與白提西接波斯精絕南至小宛可三日行地有
葡萄諸果人皆剪髮著氍帽小袖衣為衫則開頸而縫

前多牛羊驢騾其王安末染盤梁武帝普通五年遣使

貢獻謂之末國

梁史云
即且末

其國西北有流沙數百里夏月

有熱風為行旅之患風之欲至老駝先知即鳴而聚立
埋口鼻於沙中人每以為候即將羶擁蔽鼻口其風迅
駛斯須過盡若不防者必致危斃

杆彌

杆彌漢時通焉王治杆彌城去長安九千三百里戶三
千三百東北至都護治所三千五百里南與疎勒東北

與龜茲西北與姑墨接西通于闐四百里後漢改其國
曰拘彌居寧彌城順帝永建中為于闐王放前破殺其
王興陽嘉初燉煌太守徐由遣疎勒發兵擊破于闐遂
更立拘彌王靈帝熹平中又為于闐所破掠殺殆盡衆
纔千口

車師前後王

即高昌

車師前王後王並漢時通焉前王國一日前部治交河
城今交河郡水分流繞城下故為號去長安八千一百里戶

千五百西南至都護治所千八百里西域長史及戊巳校尉並治此去燉煌十三日行其地東西三百里南北五百里四面多大山後王國治務塗谷

即今蒲城今北庭府蒲類縣也

去長安八千九百里戶六百西南至都護治所千二百三十餘里北與匈奴接初漢武帝征和四年遣重合侯馬通將諸國兵共圍車師車師王降服後其王烏貴與匈奴結親教之遮漢道昭帝時匈奴復使四千騎田車師宣帝地節二年遣侍郎鄭吉校尉司馬喜將免刑罪

人田渠犂積穀欲以攻車師至秋收穀吉喜發城郭諸國兵共擊車師攻交河城破之王尚在北石城未得會吉食盡歸渠犂田至秋收後更往攻石城王乃輕騎奔烏孫吉還田渠犂及車師益積穀以安西國侵匈奴匈奴大臣皆曰車師地肥美近匈奴使漢得之多田積穀必害我國不可不爭也遣騎來擊吉吉將田士卒保車師城匈奴圍城數日乃解吉上書言車師去渠犂千餘里間以山河北近匈奴漢兵在渠犂者勢不能相救願

益田卒於是名故車師太子軍宿在焉耆者立以為王

盡徙車師國人令居渠犂遂以車師故地與匈奴車師

王得近漢田官與匈奴絕亦安樂親漢其後置戊己校

尉屯田車師故地

即今交河郡漢取之以置校尉

平帝元始中車師後

王國有新道出五船北通玉門關往來差近戊己校尉

徐普欲開以省道里避白龍堆之阨車師後王始句

音句

以道通當為挂置心不便也

挂支挂也言有所置立而支挂於已故心不便也挂

音竹禹反地又頗與匈奴南將軍地接其後舉國降匈奴是

時王莽易匈奴單于璽單于怒大擊北邊而西域亦瓦解焉者國近匈奴先叛殺都護但欽莽不能討西域因絕至後漢和帝元光二年大將軍竇憲破北匈奴車師震懼前後王各遣子入侍其後屢叛至安帝延光四年長史班勇擊其後王軍大破之桓帝永興初後部王阿羅多攻圍漢屯田且固城殺傷吏士後部侯炭遮領餘人叛阿羅多詣漢降阿羅多從百餘騎亡走北匈奴中漢立後部故王軍就質子卑君為後部王阿羅多復從

匈奴中來降於是更立阿羅多為王將卑君還燉煌以

後部人三百帳別屬役之

食其稅帳者猶中國戶數

至魏時賜其王

亦多離守魏侍中號大都尉晉以交河城為高昌郡

蓋因

其地高敞人庶昌盛立名或云昔漢武帝遣軍西討師旅頓弊者因住焉有漢時高昌壘故也

張軌呂

光沮渠蒙遜在河西皆置太守以統之後魏太武時其

前部王為沮渠無諱所攻遣使上表云不能自全遂捨

國東奔三分免一在焉耆東界幸垂賑救魏使撫慰開

焉耆倉給之文成帝末其地又為蠕蠕所并立闕伯周

為王

高昌稱王自此始

孝文太和五年高車主阿伏至羅殺闕

王以燉煌人張孟明為高昌王太和二年孟明為國人

所殺立馬儒為王以鞏顧禮麴嘉為左右長史儒又通

使後魏請內屬人皆戀土不願東徙相與殺儒立嘉為

王嘉字靈鳳金城郡榆中人

今郡地

既立為王會焉耆為

噉達所破眾不自立請王於嘉嘉遣第二子為焉耆王

由是始大益為國人所服其都城周回千八百四十步

於坐室畫魯哀公問政於孔子之像國內有城十八置

四十六鎮官有令尹有交河公田北公皆其王子也餘
官多同中國大事決之於王小事世子及二公隨狀斷
平章錄記事訖即除藉書之外無久掌文案官人雖有
列位並無曹府唯每朝集於衙門評議衆事諸城各有
戶曹水曹田曹每城遣司馬侍郎相監檢校名為城令
服飾大夫從胡法婦人裙襦頭髻畧同華夏兵器有弓
箭刀楯甲稍文字亦同華夏兼用胡書有毛詩論語孝
經歷代子史集學官弟子以相教授雖習讀之而皆為

詩賦稅則計田輸銀無者輸麻布其刑法風俗婚姻喪
葬與華夏大同其人面貌類高麗辮髮垂之於背女子
亦然其地高燥多石磧氣候溫煖與益州相似穀麥再
熟宜蠶多五果有草名為羊刺其上生蜜味甚佳赤鹽
如朱白鹽如玉多葡萄酒俗事天神兼信佛法國中羊
馬牧於隱僻以避外寇非貴人不知其所又有草實如
繭中絲如細纊名為白疊子國人取織以為布交市用
焉其國北有赤石山山北七十里有一山夏有積雪

此山之北鐵勒界也從武威西北有捷路度砂磧千餘里四面茫然無有蹊徑欲往者不可準記唯以人畜骨骸及駝糞為驗路中或聞歌哭之聲行人尋之多致亡失蓋魑魅魍魎也故商旅往來多取伊吾路魏孝文以來朝貢不絕孝明時遣使奉表自以邊遐不習典誥求借五經諸史并請國子助教劉燮以為博士許之嘉死子堅立後關中賊亂使命遂絕梁大同中遣使南奉方物普泰初遣使朝貢後遂隔絕至大統十四年詔以其

世子元嘉為王恭帝二年又以田北公茂嗣位武成元年其王遣使貢方物保定初又遣使來貢隋文帝開皇中突厥破其四城有二千人來歸中國嘉孫伯雅立其大母本突厥可汗女其父死突厥令依其俗伯雅不從突厥逼而從之煬帝大業五年伯雅來朝因從擊高麗還尚宗女華容公主八年歸蕃唐武德中遣使獻狗雌雄各一高六寸長尺餘性甚慧能牽馬銜燭云本生拂菻國其後不供職貢貞觀四年其王文泰來朝

伯雅子後

與西突厥連結諸國朝貢者路出高昌文泰稍擁絕之
至十三年太宗謂其使曰高昌數年來朝貢脫畧我使
人至彼文泰云鷹飛於天雉竄於蒿猫遊於堂鼠安於
穴各得其所豈不快邪明年當發兵以擊汝國十四年
拜侯君集為交河道大管總發兵討之羣臣諫以行萬
里兵難得志且天界絕域雖得之不可守不從文泰謂
左右曰曩吾入朝見秦隴北城邑蕭條非有隋比今伐
我兵多則糧輸不逮若下三萬我能制之度磧疲鈍以

逸待勞卧收其弊耳及聞王師至磧口悸駭無他計發
病死子智盛立君集以兵傅其城智盛降乃下其郡三
縣五城三十二戶八千四十六口萬七千七百三十馬
四千三百匹以其地為西州以交河城為交河縣始昌
城為天山縣田北城為柳中縣東鎮城為蒲昌縣高昌
城為高昌縣初西突厥遣其葉護屯兵於可汗浮圖城
與高昌為影響至是懼而來降以其地為庭州并置蒲
類縣每歲調內地更發千人鎮遏焉黃門侍郎褚遂良

諫曰古者先函夏後夷狄務先德化不爭荒遐今高昌
誅滅威動四夷然自王師始征河西共役飛米轉芻十
室九匱五年未可復今又歲遣屯戍行李萬里去者資
裝使自營辦賣菽粟傾機杼道路死亡尚不可計所遣
罪人始於犯法終於愆業無益行陣復有亡命官司捕
逮株蔓相牽有如張掖酒泉塵飛烽舉豈得高昌一乘
一卒及事乎必發隴右河西耳然則河西為我腹心高
昌他人手足也何必耗中華事無用昔陛下平頡利吐

谷渾者皆為立君蓋罪而誅之服而立之百蠻所以畏
威慕德也今宜擇高昌可立者立之召首領悉還本土
長為蕃翰中國不擾書奏不省焉者請歸高昌所奪五
城留兵以守君集勒石紀功凱旋徙高昌豪傑於中國
智盛拜左武衛將軍金城郡公弟智湛右武衛中郎將
天山郡公麴氏傳國九世百三十四年而亡智湛麟德
中以左驍衛大將軍為西州刺史卒有子昭好學有鬻
異書者母顧筍中金歎曰何愛此不使子有異聞乎盡

持易之昭歷司膳卿頗能詞章弟崇裕有武藝永徽中
為右武衛翊府中郎將封交河郡王邑至三千戶終鎮
軍大將軍武后為舉哀賻襚甚厚封爵遂絕安史之亂
其地陷沒復自為國語訖亦曰高敞然其地頗有回鶻
故亦謂之回鶻宋建隆三年四月西州回鶻阿都督等
四十二人以方物來貢乾德三年西州回鶻可汗遣僧
法淵獻佛牙琉璃器琥珀盞太平興國六年其王始稱
西州外生師子王阿厮蘭漢遣都督麥溫來獻五月遣

供奉官王延德等使高昌景德元年又遣使金延福來
貢

王延德使還叙其行程來上云初自夏州歷玉亭鎮
次歷黃羊度沙磧無水行人皆載水凡二日至都囉
囉族漢使過者遺以財寶謂之打當次歷第女嗚子
族族臨黃河以羊皮為囊吹氣實之浮於水或以橐
駝牽木筏而渡次歷茅女王子開導族行入六窠砂
砂深三尺馬不能行行者皆乘橐駝不育五穀砂中

生草名登相收之以食次歷樓子山無居人行砂磧
中以日為占旦則背日暮則向日日中則止夕行望
月亦如之歷卧梁劾特族地有都督山唐回鶻之地
次歷大蟲太子族族接契丹界人衣尚錦綉器用金
銀馬乳釀酒飲之亦醉次歷屋地因族蓋達于于越
王子之子次至達于于越王子族此九族達韃中尤
尊者次歷拽利王子族有合羅川唐回鶻公主所居
之地城基尚在有湯泉之地傳云契丹舊為回鶻牧

牛回鶻徙甘州契丹達靺遂各爭長攻戰次歷阿墩
族經馬綜山望鄉嶺上石庵李陵題字處次歷格羅
美源西方百川所會極望無際鷗鷺鳬鴈之類甚衆
次至托邊城亦名李僕射城城中首領號通天王次
歷小石州次歷伊州州將陳氏其先自唐開元二年
領州凡數十世唐時詔敕尚在地有野蠶生苦參上
可為錦帛有羊尾重者三斤小者一斤肉如熊白而
甚美又有礪石剖之得賓鐵謂之喫鐵石又生胡桐

樹經雨即生胡桐律次歷益都次歷納職城在大患
鬼魅磧之東南望玉門關甚近無水草載糧以行凡
三日至鬼谷口避風驛用本俗法試茶出詔押禦風
風乃息凡八日至驛田寺高昌聞使至遣人來迎次
歷地名寶莊又歷六鍾乃至高昌即西州也其地南
距于闐西南距大食波斯西距西天步露沙雪山葱
嶺皆數千里地無雨雪而極熱每盛暑居人皆穿地
為穴以處飛鳥羣萃河濱或起飛即為日氣所燂墜

而傷翼屋宇覆以白堊開寶三年雨及五寸即廬舍
多壞有水出金嶺導之周繞國城以溉田園作水磴
地產五穀惟無蕎麥貴人食馬餘食羊及鳧鴈樂多
琵琶箏篴出貂鼠白氍繡文花藥布俗好騎射婦人
戴油帽謂之蘇幕遮用開元七年歷以三月九日為
寒食餘二社冬至亦然以銀或鍮石為筒貯水激以
相射或以水交潑為戲謂之壓陽氣去病好游賞行
者必抱樂器佛寺五十餘區皆唐朝所賜額寺中有

大藏經唐韻玉篇經音等居民春月多羣聚遨樂於
其間游者馬上持弓矢射諸物謂之禳災有敕書數
藏唐太宗明皇御札詔勅緘鎖甚緊復有摩尼寺波
斯僧各持其法佛經所謂外道者也所統有南突厥
北突厥大衆慰小衆樣磨割祿點憂司永蠻格哆族
豫龍族之名甚衆國中無貧民絕食者共振之人多
壽考率百餘歲絕無夭死時四月師子王避暑於北
庭以其舅阿多于越守國先遣人致意於延德曰我

王舅也使者拜我乎延德曰持朝命來禮不當拜復
問曰見王拜乎延德曰禮亦不當拜阿多于越復數
日始相見然其禮頗恭師子王邀延德至其北庭歷
交河州凡六日至金嶺口寶貨所出又兩日至漢家
寨又五日上金嶺過嶺即多雨雪嶺上有龍堂刻石
記云小雪山也嶺上有積雪行人服毛罽度嶺一日
至北庭憇高臺寺其王烹羊并馬以具膳尤豐潔地
多馬王及王后太子各養馬牧放於平川中彌亘百

餘里以毛色分別為羣莫知其數北庭川長廣數千里鷹鵠鵙之所生多美草下生花砂鼠大如鸛鷖禽捕食之其王遣人來言擇日以見使者願無訝其淹久至七日見其主王及王子侍者皆東向拜受賜旁有持磬者擊以節拜王聞磬聲乃拜既而王之兒女親屬皆出羅拜以受賜遂張樂飲宴為優戲至暮明日泛舟於池中池四面作鼓樂又明日遊佛寺曰應運泰寧之寺貞觀十四年造北庭北山中出礪砂

山中常有煙氣涌起而無雲霧至夕光焰若炬火照見禽鼠皆赤采礪砂者着木底鞵若皮為底者即焦下有穴生青泥出穴外即變為砂石土人取以治皮城中多樓臺卉木人白皙端正性工巧善治金銀銅鐵為器及攻玉善馬直絹一疋其駕馬充食者纔直一大貧者皆食肉西抵安西即唐之西境七月令延德先還其國其王九月始至亦聞有契丹使來使缺唇以銀葉蔽之謂其王云聞漢遣使入達靼而道出王境

誘王窺邊宜早送至達勒無使久留因云高敞本漢
土漢使來覘視封域將有異圖王當察之延德偵知
其語因謂王曰犬戎素不順中國今乃反間我欲殺
之王固勸乃止自六年五月離京師七年四月至高
昌所歷以詔賜諸蕃君長襲衣金帶繒帛八年春與
其謝恩使凡百餘人復循舊路而還雍熙元年四月
至京師延德初至達勒之境頗見晉末陷敵者之子
孫咸相率遮迎獻飲食問其鄉里親戚意甚悽感留

旬日不得去延德之所述云

龜茲

龜茲

一曰邱茲
又曰屈茨

漢時通焉王治延城

今名伊
邏盧城

都白山之

南二百里

隋西域圖云白山一名阿羯山
常有火及煙即出硃砂之所

東去長安七

千五百里戶七千南與精絕東南與且末西南與杆彌

北與烏孫西與姑墨接能冶鑄俗有城郭東至都護治

所烏壘城四百里烏壘戶百十與都護同治其南三百

里至渠犂東北與尉犂東南與且末南與精絕接昭帝

田輪臺與渠犂地皆相連也晉武帝時其王遣子入侍
惠懷末以中國亂遣使貢方物於張重華苻堅堅遣其
將呂光伐之其王白純距境不降光進軍討平之立其
後白震為王其所居城方五六里城三重中有佛塔千
所其刑法殺人者死刦賊則斷其一臂并刖一足賦稅
準地徵租無田者則稅銀風俗婚姻喪葬物產與焉耆
略同唯氣候少溫為異又出細氊饒銅鐵鉛麋皮毼氍
毹沙鹽綠雌黃胡粉安息香良馬犂牛等東有輪臺即漢

李廣利所屠者其南三百里有大河東流號計戍水即黃河也東去焉者九百里南去于闐一千四百里西去疏勒一千五百里北去突厥牙六百里東南去瓜州三百里其東關城屯寇竊非一魏太武詔將軍萬度歸率騎一千以擊之龜茲遣烏羯目提等領兵三千拒戰度歸擊斬之斬二百餘級大獲駝馬而還俗性多淫置女市收男子鐵以入官土多孔雀羣飛山谷間人取而食之孳乳如雞鶩其王家恒有千餘隻云其國西北大山

中有如膏者流出成川行數里入地狀如餽餉甚臭服之齒髮已落者能令更生癘人服之皆愈自後每使朝貢周保定元年其王遣使來獻隋大業中其王白蘇尼呬遣使朝貢方物是時其國勝兵可數千人唐高祖受禪其王遣使入貢貞觀四年獻馬帝賜璽書撫慰後臣西突厥郭孝恪伐焉耆乃遣兵與焉耆應援自是不朝貢二十一年兩遣使入朝貢帝怒其佐焉耆叛乃以阿史那社爾為崑邱道行軍大總管部兵十萬討之社爾

凡破五大城俘男女數萬遣使者諭降小城七百餘西域震懼社爾乃立王弟葉護王其國勒石紀功始徙安西都護於其都統于闐碎葉疏勒號四鎮高宗復封訶黎布失畢為龜茲王與其降王還國後為降王所拒復發兵討誅之以其地為龜茲都督府更立子素稽為王是歲徙安西都護於其國以故安西為西州都督府治儀鳳時吐蕃攻焉耆以西四鎮皆沒長壽元年武威道總管王孝傑破吐蕃復四鎮地置安西都護府於龜茲

以兵三萬鎮守於是沙磧荒絕民供貲糧甚苦議者請
棄之武后不聽都護以政績稱者田揚名郭元振張孝
嵩杜暹云開元七年王白莫宓死子多市立改名孝節
十八年遣弟孝義來朝自龜茲贏六百里踰小沙磧有
跋祿迦小國也一曰亟墨即漢姑墨國橫六百里縱三
百里風俗文字與龜茲同言語少異出細犂褐西三百
里度石磧至凌山葱嶺北原也水東流春夏山谷積雪
西北五百里至素葉水城比國商胡雜居素葉以西數

十城皆立君長役屬突厥自素葉水城至羯霜那國衣
氍褐皮氍以繒繚額素葉城西四百里至千泉地羸二
百里南雪山三垂平陸多泉池因名之突厥可汗歲避
暑其中羣羆鹿飾鈴鐸可狎也西羸百里至咀邏私城
亦比國商胡雜居有小城三百本華人為突厥所掠羣
保此尚華語西南羸二百里至白水城原隰膏腴南五十
里有笈赤建國廣千里地沃宜稼多葡萄又二百里即
石國宋大中祥符三年龜茲王可汗遣使貢方物天禧

四年又入貢自天聖至景祐四年龜茲入貢者五最後
賜以佛經一藏其國主自稱師子王衣黃衣寶冠與宰
相九人同治國事其國西至大食國六十日行東至夏
州九十日行或稱西州回鶻或稱西州龜茲或稱龜茲
回鶻熙寧四年五年俱入貢紹聖三年使大首領阿連
撒羅等三人以表章及玉佛至洮西熙河經畧使以其
罕通使請令於熙秦等州博買而估所賣物價答賜遣
還從之

且彌

西且彌國王治天山東於太谷在車師北本屬役車師
去長安八千六百七十里戶三百三十二口千九百二
十六勝兵七百八十三人西且彌侯左右將左右騎君
各一人西南至都護治所四百八十里東且彌國王治
天山東兌虛谷去長安八千二百五十里戶百九十一
口千九百八十四勝兵五百七十二人東且彌侯左右
都尉各一人西南至都護治所千五百八十七里

焉耆

焉耆漢時通焉王治員渠城在白山之南七十里去長安七千三百里戶四千西南都護治所四百里南去尉犁百里北與烏孫接東去交河城唐郡九百里西去龜茲

九百里皆沙磧其國近海水多魚鹽蒲葦之利四面有大山道險阨易守海水曲入四山之內周匝其城三十餘里後漢明帝永平末有戶萬五千與龜茲共攻沒都護陳睦至和帝永光六年都護班超發諸國兵討之殺

其王超乃立焉耆左侯元孟為王至安帝時西域背叛
延光中超子勇為西域長史復討定之晉武帝太康中
其王龍安遣子入侍安夫人糴胡之女糴古邁反姪身十二


月剖脇生子曰會立為世子會少而勇傑安病篤謂會
曰我嘗為龜茲王白山所辱汝能雪之乃吾子也及會
立襲滅白山遂據其國遣子熙歸本國為王會有膽氣
籌略遂霸西域葱嶺以東莫不率服其俗丈夫剪髮婦
人衣襦著大褲婚姻同華夏兵有弓刀甲稍死亡者皆

焚而後葬其服制滿七日則除之俗事天神氣候寒土
田良沃穀有稻粟菽麥畜有駝馬牛羊養蠶不以為絲
唯取纊綿俗尚葡萄酒兼愛音樂其後張駿遣沙州刺
史楊宣率衆經理西域宣以部將張植為前鋒軍次其
國進屯鐵門未至十餘里熙又率衆先要之於遮留谷
植將至或曰漢祖畏於栢人岑彭死於彭亡谷名遮留
殆將有伏單騎嘗之果有伏發植擊敗之進據尉犁熙
降於宣呂光僭位熙遣子入侍至魏遣成周公萬度歸

討之其王尸鳩卑那衆大潰單騎走入山中度歸進屠其城四部諸戎皆降服焉耆為國斗絕一隅不亂日久獲其珍奇異玩殊方詭譎難名之物橐駝馬牛雜畜鉅萬至後周武帝保定四年其王遣使獻名馬隋煬帝大業中其王龍突騎遣使貢方物唐貞觀六年龍突騎遣使來朝自隋亂磧路閉故西域朝貢皆道高昌突騎支請開大磧道以便行人帝許之高昌怒大掠其邊西突厥復攻之與高昌臨其五城掠千五百人焚廬舍遣使

言狀詔侯君集討高昌突騎支引兵佐唐高昌破歸向
所俘及城遣使入謝其後與西突厥相約為輔車勢不
朝貢乃命安西都護郭孝恪討之傳其城執突騎支更
以栗婆準攝國事後其從兄薛婆阿那支自為王執栗
婆準獻龜茲殺之阿史那社爾討龜茲擒阿那支斬以
狗立突騎支弟婆伽利為王以其地為焉耆都督府婆
伽利死國王請還前王突騎支許之歸國死龍嬾突立
開元七年龍嬾突死吐拂延立訖天寶常朝貢其後盡

并有漢時尉犁危須山國三國之地并鄯善之北界矣



文獻通考卷三百三十六